

cette entrée est fort curieuse et très recherchée on la trouve
rarement, surtout si bien conservée que l'est cet exemplaire.


7.9.32



LA IOYEVSE

& magnifique
ENTRÉE
de Monseigneur
FRANÇOYS,
FILS DE FRANCE,
ET FRERE VNICQUE DV
Roy, par la grace de Dieu,
DVC DE BRABANT,
d'Anjou, Alençon, Berri, &c.
en sa tres-renommée ville
D'ANVERS.

A ANVERS,
De l'Imprimerie de Christophle Plantin.
M. D. LXXXII.





LA JOYEUSE

& magnifique
ENTREE
de Monsieur
FRANÇOIS
FILS DE FRANCE,
ET FRERE UNIQUE DU
Roy, par la grace de Dieu,
DUC DE BRITTANY,
d'Anjou, d'Alençon, Berry, &c.
en sa tres-venerable
d'ANVERS.

A ANVERS
De l'imprimerie de Christophe Plantin
M. D. LXXII



P R E F A C E.

IL y a eu par cy deuant és plus grands Empires, Monarchies & Republiques, des estranges & admirables changements, qui sont aduenus par le iuste iugement de Dieu sur les hommes pour des fautes horribles & enormes: & comme Dieu a faict tels iugemens pour manifester sa iustice, qui scait abbatre l'orgueil des plus grands qui abusent de leur authorité; aussi il les a proposez, pour exemple à ceux qui suiuroyēt par apres, és mains desquels il mettroit les sceptres pour regir les peuples: afin qu'ils entendissent, ainsi qu'ils se disent regner par sa grace, aussi qu'ils sont ses lieutenants & ministres de sa iustice en terre, & par ce moyen n'abusassent de ceste souueraine authorité, et presque diuine, dont il les auoit honorez. Aussi (ce qui n'est pas aduenu sans la providence de Dieu) se sont tousiours trouuez des hommes doctes & rares esprits qui ont transmis à la posterité la memoire de tels changements pour leur seruir d'exemple; laissant par escrit les causes de tels accidens avec leurs effects & diuers euenemens: afin quand semblables reuolutions aduiendroyent, que les hommes peussent estre preparez, pour prendre conseil le plus salutaire, ou pour le moins, le moins domma-geable pour leur Pays & pour leurs personnes priuées. Thucydide Athenien prince de l'histoire tesmoigne auoir entrepris de descrire la guerre ciuile d'entre les Grecs appelée Peloponnesiaque, laquelle a esté pleine de diuers changements, pour seruir d'exemple à ceux qui viendroyent apres luy, quand ils se trouueroyent en guerre de semblable nature: Et à la verité les hommes sages, & qui ont examiné prudemment les causes des guerres ciuiles aduenües, tant passez, sont quelques siecles que de nostre aage, ont trouué beaucoup de choses conformes à la description de ladite guerre; soit és causes & effects, difficultez de resouldre, differents esprits, empeschemens à l'execution, trahisons, perfidies, soubçons, mesdisances & calumnies contre gens de bien, & autres semblables accidens. Le semblable se peut aussi voir és autres Historiographes: car d'autant plus ils ont escrit proprement & fidelement, d'autant plus ils ont faict cognoistre que le dire de l'Orateur estoit vray, Que l'Histoire est la maistresse de vie. Or si il y a iamais eu changement notable au monde, & qui soit digne d'estre communiqué à la posterité; c'est celuy qui est suruenü en ces Pays-bas. Car soit que nous regardions les qualitez trop differentes des deux Princes, qui sont en-

trez premierement en ceste guerre, l'inegalité de leurs forces, les causes diuerses qui les ont meus de venir aux armes de part & d'autre, les diuers succés, les entreprinſes ſecrettes conduittes ſagement d'une part, & de l'autre par fineſſes, tromperies & meſchancetez; les traictez de paix & union faiçts, reſaiçts, & deſaiçts, la diuerſité des partis que meſmes perſonnes ont ſuiui preſque en meſme temps; & finalement le changement de Prince ſuiuy d'une longue, meure, & prudente deliberation; les trauerſes qui y ont eſté donnees, et ce qui aduiendra par cy-apres; ces choſes diſ-ie diligemment examinees, ſe trouuera qu'il y a eu parcy-deuant peu de changements qui ayent mieux meritè d'eſtre mis en lumiere, que celui que nous auons deuant nos yeux. Ce qui nous faiçt eſperer, que Dieu ne permettra point qu'un ſi bel exemple & ſi rare ſoit enſeueli; ains qu'il ſuscitera perſonnage ſage, doçte, & eloquent, idoine pour le deſcrire, & le representer à la poſterité. Cependant comme c'eſt noſtre debuoir d'aider celui qui entreprendra un ſi grand œuvre, ſi haut & ſi difficile, & comme un des points principaux & des plus ſignalez eſt eſchēu à l'innueſtiture du Duché de Brabant en la perſonne de Monſeigneur François ſils & frere unique de France, Duc d'Anjou, & ſon entree en la tresrenommee ville d'Anuers; pendant que la memoire eſt encores recente; il nous a ſemblé eſtre de noſtre debuoir de le deſcrire au vray, tant pour en informer les nations eſtranges, que pour ſeruir de memoires à celui, qui fera part à la poſterité de l'hiſtoire entiere & vniuerſelle, du changement ſuruenū en ces Pays. Cependant nous auons bien voulu aduertir vn chacun, combien que nous n'ayons aucune occaſion de nous repentir de la reception faiçte à Mondit Seigneur, d'autāt principalement qu'il luy a pluſ ſ'en contenter, toutes ſois que ladite ville d'Anuers n'a point eu plus de ſix iours de terme pour ſe preparer à l'entree d'un ſi grand Prince: afin que tous entendent quelle a eſté l'affection du peuple qui en ſi peu de temps ſ'eſt ſi grandement preparé, & quelle euſt eſté la magnificence de l'entree, ſi par le temps elle euſt peu reſpondre à la volūté & vehement deſir de tous les habitans de ladite tresrenommee & tresopulente ville d'Anuers.

1

LE PARTEMENT
D'ANGLETERRE DE MON-
SEIGNEVR LE DVC D'ANIOV,
ET SA RECEPTION EN
ZEELANDE.



A ROYNE d'Angleterre, & Monseigneur le Duc d'Anjou ayants entendu le rapport fait à sa Majesté, & à son Alteze par le Sieur des Pruneaux (qui auoit esté, peu au parauant, enuoyé vers Monsieur le Prince d'Orange par S. A. comme aussi il auoit poursuiui le traicté les années precedentes, comme Ambassadeur ordinaire) de la bonne volonté, & longue attente, en laquelle il auoit trouué Monsieur le Prince d'Orange, estant venu en l'Isle de Walkeren avec grand nombre de Gétils-hommes, Deputez des Estats, & principales bonnes Villes du pais bas, pour y receuoir son Alteze, & luy faire tout tres-humble seruice; ayants aussi ouy l'Ambassade des Sieurs d'Ohain, & Iunius enuoyez desdits Sieurs des Estats vers son Alteze, declarants lesdits Sieurs Ambassadeurs l'extreme desir que tout le peuple auoit de veoir son Alteze, pour ratifier en presence mutuellement les Contrac̃ts precedens; & la necessité qu'il y auoit que S. A. passast en diligence: confirmans ce que par plusieurs fois auoit esté remonstré par le Sieur du Mont S. Aldegonde ambassadeur ordinaire à sa Majesté, & à son Alteze: Ces choses doncques entendues, fut resolu par sadite Majesté, & Alt. le partement de mondit Seigneur. Suiuant quoy la Royne ayant appellé My-Lord Hauward, luy commanda (à raison de la maladie du Sieur Conte de Lincoln grand Admiral d'Angleterre) de prédre la charge de Vice-Admiral, d'aller à Rochestre, pour y choisir les vaisseaux propres pour porter S. A. & sa suite; les faire equipper de gens de guerre, matelots, & toutes sortes de munitions, tant de guerre, que de viures. Ce qui fut fait en telle diligence, & celerité que les nauires furent prests de toutes choses en moins de huit iours; & sortirent de la riuere dudit Rochestre, & de la Tamise: & furent conduits aux Dunes pres
A de la

de la ville de Sandwich, ou se deuoit faire l'embarquement. Et comme mondit Seigneur estoit venu en Angleterre, accompagné seulement de quelque peu de Princes & Seigneurs, ayant mesme son Alteze, & lesdits Prince & Seigneurs laissé leur train en France, aucuns aussi d'esdits Seigneurs retournez en France, par le commandement de Son Alt. & pour son seruice: La Royne se resolut luy donner compagnie, & suite conuenable à sa grandeur, s'acheminant pour vn si grand & si notable effect. Et pourtant commanda à Messieurs le Conte de Lecestre, grand escuier d'Angleterre, My-Lord Hunsdon, gouuerneur de Barwich, proche parent de sa Majesté, tous deux du Conseil priué, & My-Lord Haward Vice-Admiral, tous Cheualiers de l'ordre de la Iartiere, de l'accompagner, & d'assembler le plus grand nombre qu'ils pourroyent en si peu de temps, de Seigneurs, & Gentils-hōmes Anglois pour honorer Son Alt. A quoy fut par lesdits Seigneurs obeï fort promptement, festans ioints à eux & les suiuaſ My-Lords Willouby, Windfore, Sheffeld, Haward, Ardlei fils second du feu Duc de Nortfolc, le Seigneur de Sidnai, nepueu dudit Seigneur Côte de Lecestre, les trois fils dudit My-Lord de Hunsdon; à sçauoir Messire George Carentue, Iean & Robert Carentue, le frere dudit Seigneur de Hauward, Monsieur Guillaume Hauward, les Cheualiers Shurlei, Parrat, Russel, Guillaume Drevrei, George Boucer, & grand nombre d'autres Gentils-hommes faisant la suite dudit Seigneur Conte enuiron cent Gentils-hommes, & plus de trois cents seruiteurs. Ledit Seigneur de Hunsdon auoit à sa suite cent cinquante, tant Gentils-hommes qu'autres, & ledit Seigneur Hauward autant.

La Royne se resolut d'accompagner Son Alteze iusques sur le bord de la mer, & neantmoins commanda ausdits Seigneurs de tenir sa place, accompagner Son Alteze iusques audit lieu, assister aux ceremonies, entrées & festins. Son Alteze au cōtraire la supplioit, & insistoit que Sa Majesté ne voulust bouger de Londres, tant pour les incommoditez qu'elle receuroit au voyage, que parce que Son Alt. voyant le temps beau, & vêt propice, desiroit de ne perdre aucune occasion de parfaire ledit voyage en toute diligēce. Ce qu'il ne peut impetrer; ains se mist la Royne en chemin avec toute la Cour, le premier iour de Feburier, & fist son premier logis à Rochestre. Le lendemain se passa audit Rochestre, sa Majesté faisant voir à S. A. tous ses grands vaisseaux, qui
sont

sont audit lieu ; dans la plus part desquels entra Son Alt. avec les Prince & Seigneurs de sa suite, non sans grande admiration des Seigneurs & Gentils-hommes François ; qui confessoient bien, que c'est à bon droit qu'on dit la Roynie d'Angleterre, estre la Roynie de la Mer. Son Alt. aussi vit tous les equippages desdits navires prests, & luy fut dit par sa Majesté, Tous ses vaisseaux, & equippage estre à son service, toutes les fois qu'il les voudroit employer : de quoy il remercia humblement sa Majesté : & apres avoir ioué toute l'artillerie, se retirerent pour ce iour audit Rochestre.

Le troisieme iour vindrent à Setimbourg, où dînerent ensemble sa Majesté & son Alt. estant la Roynie servie, à la façon Angloise, des plus grand's Dames de sa Cour, & son Alteze à la Françoisse par les Gētils-hommes de sa suite. Lesquelles Dames & Gentils-hommes dînerent apres ensemble. Son Alteze persuevroit de supplier sa Maieité, de ne point passer outre, luy remonstrant le beau temps qui se passoit. Mais non obstant ses prieres, la Roynie passa outre iusques à Cantorbery. Auquel lieu apres avoir seiourné vn iour, & ayant sa Maieité festoyé publiquemēt toute la noblesse Françoisse, Se dist d'une part & d'autre l'A-Dieu : non sans grands regrets, & demonstrations de tres-grande amitié ; principalement entre sa Maieité & S. A. Ce que aussi fut cogneu entre les Seigneurs, Gentils-hommes d'une, & d'autre nation ; & pareillement des Dames : ayants tous regret esgal, apres avoir conuersé & vescu ensemble amiablement, & fraternellement par l'espace de trois mois, sans aucun changemēt ni alteration de leurs bonnes volontez. Mais l'honneur qui pressoit S. A. luy fist adoucir ces regrets, & prendre son chemin avec lesdicts Prince, & Seigneurs tant d'une que d'autre nation.

Le sixiesme iour dudit mois son Alteze estant deliberée de s'embarquer, fut cōseillée de coucher à Sădwich pour ceste nuit, à raison que le vent s'estoit vn peu changé. Mais aucuns Gentils-hommes Anglois, à sçavoir le Sieur Killegreye, le Sieur Byar, & autres (pour eiter la presse à l'embarquement) ayans prins le chemin de Douures, s'embarquerent le mesme soir : & se tenans à l'ancre, peu apres minuit firent voile avec quelques autres vaisseaux. Le lendemain septiesme à neuf heures du matin se fist l'embarquement de son Alteze en trois grands vaisseaux de guerre : au plus grand, nommé la Descouverte, s'embarqua

son Alteze; avec Monsieur le Conte de Leceſtre, & ledit Seigneur Vice-admiral; au ſecond nommé la Sentinelle, ſ'embarqua Monsieur le Prince Daulphin; & au troiſieſme Monsieur le Conte de Laual, & My-Lord de Hunſdon. Et eſtant ſon Alt. encor à l'ancre arriua vn courier de la part d'un Seigneur d'Angleterre, qui fiſt entendre à S. A. que les Eſtats du Pais bas ſ'eſtoient reuoltez, & nommément la ville d'Anuers; & pourtant qu'il le ſupplioit de ne bouger, iuſques à en auoir plus certaines nouuelles. Ce nonobſtant ſ'eſolut ſon Alteze de partir: Et fiſt voile avec quinze vaiſſeaux bien equippez, ayant vn ſi beau temps (quiluy a depuis continué iuſques apres ſon entrée, ceremonies & feſtins en la ville d'Anuers) qu'il ſembloit le ciel, les vents, la mer, & la terre fauoriſer à ce voyage, & à l'alegreſſe que ont monſtré les peuples qui l'ont receu d'une ſi grâde affection. Cependant Monsieur le Prince d'Orange, voyant le temps propre, partit de Middelbourg, où il auoit attendu ſix ſemaines & plus Son Alt. & vint à Fleſſinghe, pour dōner ordre à tout ce qui conuiendroit, pour receuoir vn ſi grand Prince honorablement, & commodement. Auquel lieu ayant entendu par lettres deſd. Seigneurs Ambaſſadeurs, & autres le departement de ſon Alteze de Londres, & ſon arriuement à Canterbury, & iugeant à peu pres le temps de la venuë de S. A. depeſcha le Sieur de Treſſon ſon Lieutenant en l'Admirauté de Zelande, avec vn petit nauire nommé la Chaffe, pour aller au deuant de ſon Alteze, avec commandement, ayant deſcouuert la flotte, de donner le ſignal deux coups de Canon. Lediſt Sieur de Treſſon ayant ſur l'heure de midy deſcouuert les vaiſſeaux qui eſtoient partis de Douure, & penſant que ce fuſt la grand flotte, donna le ſignal. qui fut cauſe que quelque vaiſſeau ſe miſt en mer pour aller au deuant de S. A. Mais peu apres ayant cogneu l'erreur, retourna à Fleſſinghe: auquel lieu arriua peu apres ladite flotte de Douure. Et paſſant outre ledit Sieur de Treſſon trouua ſon Alteze, & la grand' flotte entre Nieuport & Dunkercke. Où apres auoir amené le bourſet & ſalué, & luy eſtre reſpondu, Son Alt. eſtant ſur le tillac reconnut vn ſien Secretaire nommé Nepueu, eſtant pareillemēt ſur le tillac de la Chaffe: auquel il enuoya le baſteau de ſon nauire, & luy commanda venir à ſoy. Ce qu'il fiſt. & par iceluy il fut aduertit qu'il n'eſtoit rien de l'aduertiſſement de la reuolte deſdits Eſtats: ains que toutes choſes eſtoient fort bien,

& que

& que S. A. estoit attenduë en grande deuotion . Ce iour, à raison que le vent se tournoit au Nord-Ost, ne peurent passer outre, & mouillerēt l'ancre au trauers d'Ostende, pour y passer la nuit, en attendant la marée du lendemain matin . On descouuroit de Flessinghe ladicte flotte, où peu apres minuit arriua le Sieur de Sainte-Aldegôde, qui assëura mondit Sieur le Prince d'Orange, que le lendemain arriueroit S. Alt. à la marée: qui fut cause que le matin, ledit Seigneur Prince, & Monsieur le Prince d'Espinoy avec plusieurs gentils-hommes se mist en mer: mais à raison que la marée estoit contraire, & d'autre part S. A. ayant le vent escars estoit contrainte de faire des bords, ne peut ledit Seigneur Prince ioindre le vaisseau de son Alteze, & pourtant fut contraint de retourner les voiles vers Flessinghe; où auoit ja pris terre Monsieur le Prince Daulphin, qui cherchoit par tout Monsieur son frere: & s'estās embrasséz en freres, & entresalüez, voyant ledict S' Prince d'Orange son Alteze fort approcher, se remist derechef en mer. Mais voyant son Alteze descendre en la barque de son vaisseau, pour prendre terre, retourna vers le port, & fist tant qu'il y arriua le premier: où il attendit son Alteze. laquelle estant arriüée, & estant sur le bord de la barque, preste à descendre, fut receuë par ledit Seigneur Prince: lequel ayant fait la grâde reuerence, & embrassant le genouil de son Alteze, luy dist en peu de parolles, voyant qu'il faisoit froid: Qu'il estoit trefaïse de voir ceste heureuse iournée, & tant attendue; en laquelle il auoit cest' honneur de voir S. A. pour luy offrir son treshumble seruice, ses moyens, ses biens, & sa propre vie; esperant que par Son Alt. ce pais (apres auoir tāt souffert) seroit mis en pleine deliurance . A quoy luy fut respondu par son Alteze fort sagement, & succinctement. Et apres l'auoir embrassé, avec honneur, & respect de son aage, & de ses faïcts, son Alteze descendit en terre, & fut conduit par ledit Seigneur Prince en la maison de ville, toutesfois à grand peine, pour la grand' presse des gens de guerre, & peuple se pouffans les vns les autres: ceux du pais pour voir S. A. & les Anglois qui ia estoient descēduz en grand nombre, pour cognoistre ledit Seigneur Prince. Cependant les trompettes, & tambours sonnoyent avec tel bruiët que l'air en retentissoit; & toute l'Artillerie ioüa, tant des nauires de la Royne; qu'autres nauires en grand nombre qui estoient en rade; avec si grand bruiët & tonnerre, qu'ils porterent les nouuelles à Calais,

& autres lieux de France, de l'heureuse arriuée de son Alteze és Pais-bas. Celle de la ville de Flessinghe ioïa deux fois, avec tel bruiët (pour l'excessif nombre de pieces qui sont en ladicte ville) que toute la terre en retentissoit. Son Alt. trouua audit lieu toutes sortes de ses Officiers : d'autant que quatre iours auparauant sa maison & sa garde de Suisses, & de François partie de Calais & de Boulogne estoit arriuée à Middelbourg. Le Magistrat de la ville l'attendoit à l'entrée de la ville ; lequel luy declara par la bouche de leur Pensionnaire, qu'ils luy congratuloyent sa bien-venue, s'estimoyent heureux de le veoir, esperoyent par sa conduite & autorité voir le Pais estre reduit en paix, & remis en son ancienne splendeur.

Les Estats de Brabant, parlans par la bouche du Sieur van Stralen Amptman de la ville d'Anuers, l'ayant congratulé de sa venue, declarerent, de quelle affection les nobles & bonnes villes de Brabant l'attendoient, le supplians tres-humblement d'honorer biē tost le pais de Brabāt de sa presence. En apres les deputez de la ville de Brusselles, outre la declaration qu'ils firent de la bonne volonté, & en general de tout le peuple du pais, aussi declarerent en particulier, de quelle volonté & affectiō son Alteze estoit attenduë en ladicte ville, siege principal des Seigneurs du pais : & qu'apres tant de maux qu'elle auoit soufferte, pour repousser la tyrannie des Espaignols, apres Dieu, n'auoit espoir qu'en la venue de S. A. leur Prince & Seigneur.

Ceux d'Anuers furent ouïs apres, qui declarerent l'affection du peuple enuers son Alteze, la longue attente, & le grand desir qu'ils auoyent de veoir leur Prince & Seigneur. Les Colonels & Capitaines de ladicte ville parlerent apres, qui declarerent la soigneuse & diligente garde qu'ils auoyent faicte de ladicte ville, esperant la mettre de bref entre ses mains, se resiouissants pareillement de sa venue. A toutes ces harangues fut respondu fort sagement, & succinctement par son Alteze, comme à toutes autres, au gré & contentement d'un chacun des assistants.

Monsieur le Prince d'Orange demeura quelque temps avec S. A. en la maison de ville, & ayant prins congé, alla visiter les Princes & Seigneurs, d'une & d'autre natiō, venuz avec son Alteze, pour cognoistre comment ils estoient accommodez, & pour donner ordre que tous eussent contentement, tant que la ville de Flessinghe (qui n'est pas des plus grādes) le pouuoit faire :
à quoy

à quoy fut tellement pourueu que tous furent bien logez & seruis : combien que de la part seulement des Seigneurs Anglois eussent mis pied à terre pour ce iour plus de cinq cens hommes. Tout le soir se passa en festins, feux de ioye, feux artificiels, sons de trompettes, & toutes demonstrations de la ioye, que tous vniuersellement auoyēt de la venue d'un si grand Prince. Les deputes des quatre membres de Flandre (qui estoient aussi venus, par le conseil de Monsieur le Prince d'Orange) attendirent à se presenter à Middelbourg.

Monsieur le Prince d'Orange voyant l'intention de son Altezeste d'aller le lendemain à Middelbourg, luy proposa qu'il y auoit trois chemins, l'un par dehors, par deuant le chasteau de Rammekins, pour entrer au grand canal de Middelbourg, par l'endroit de la Teste ; l'autre par le petit canal par dedās le pais, & qu'il auoit fait tenir nauires prests, pour aller par dehors, & nombre de barques pour aller par dedans les terres, qu'à raison de l'hyuer n'ayant S. A. moyen de faire le chemin ni en coche, ni à cheual, & qu'il ne restoit que la chaussée, par où on va ordinairement à pied : S. A. voyant la commodité du temps (qui estoit à la verité tres-beau) & ayant entēdu le chemin n'estre plus long que d'une bonne lieue Françoisse, entreprist de faire le voyage à pied ; comme aussi tous les Princes, Seigneurs, & Gentils-hommes, tant du Pais, que François, & Anglois firent le semblable. Plusieurs de la maison de S. A. qui ia estoient logez à Middelbourg, luy vindrent au deuant, & mesme sa garde Françoisse, & ses Suisses. Loing hors de la ville le Magistrat de Middelbourg vint au deuant, enuiron le tiers du chemin ; & là luy fist la harangue, declarant aussi le grand & long desir que tout le peuple auoit de sa venuë, & que particulieremēt ceux de la ville de Middelbourg se sentoient grandement honorez, de ce qu'il luy auoit pleu veniren leur ville, avec offre de tout debuoir. Sa garde le rencontra au mesme lieu, & dès lors les Suisses commencerent à marcher en leur ordre, & battant le tambour à leur façon. Six compagnies de Bourgeois bien armez, & en bon equippage, estoient en bataille hors de la ville : qui s'y tindrent iusques à ce qu'il fust passé. & puis se mirent à le suiure au pas.

Les Deputes des Estats du Conté de Zelande, attendoyent à l'entrée de la ville : lesquels luy ayant déclaré la ioye qu'ils receuoient, luy ayans congratulé des heureux succés que Son Alt.
auoit

auoit eu en la confection de la paix en France; de la deliurance de la ville de Cambray, faicte par ses armes & en personne; de son passage en Angleterre, qu'ils scauoient n'auoir esté entrepris que pour l'aduancemēt des affaires de ces Pais, & finalement qu'il auoit exposé sa personne au danger du passage, estoit arriué heureusement en Zeelande, remercierent Son Alteze tref-humblement; declarants l'esperoir qu'ils auoient conceu de sa presence, avec tout offre de tres-humble deuoir.

On amena à S. A. vn courfier de Naples à l'entrée de la ville: mais il se resolut (voyant les Princes & Seigneurs n'auoir leurs cheuaus) de paracheuer aussi le chemin à pied, & entra en la ville de Middelbourg en tel ordre. Premierement marchoyent les Seigneurs de la ville avec leurs officiers & seruiteurs de la Iustice; en apres les Deputez desdits Estats de Zelande: Plusieurs gentils-hommes de toutes les trois nations & Deputez des villes de Brabant, & des quatre membres de Flandres suiuyoient; apres les Suisses marchoyent à leur façon accoustumée, qui estoient suiuis de grand nombre de Seigneurs & Gentils-hommes, dont le plus grand nombre estoient Anglois, de la suite des trois Seigneurs enuoyez par la Roynie: & sur la fin marchoyent, comme en gros, Messieurs le Prince Daulphin, Conte de Lecestre, Prince d'Espinoi, Conte de Lauall, my Lord Hunsdon, my-Lord Hauward & autres Seigneurs: Puis son Alteze ayant à sa fenestre plus bas d'un demy pas Monsieur le Prince d'Orange, auquel il demandoit tousiours quelque chose. Les gardes Francoyses de son Alteze suiuyoient, puis les gardes de Monsieur le Prince d'Orange, & pour la fin les six enseignes qui auoient esté en bataille hors la ville, & dix autres qui auoient bordé les ruës iusques au marché, où le reste estoit en bataille, tous Bourgeois. Il y auoit par toutes les ruës, depuis la porte iusque au logis de Son Alteze, des barrieres, & de dix pas en dix pas, de part & d'autre, des flambeaux allumez: & ainsi passa Son Alt. s'esmerueillât, & toute la noblesse qui l'accompagnoit; de voir vne si belle ville en vne si petite Isle, & si pres de trois autres bonnes villes; n'estās distantes plus d'une lieüe les vnes des autres; & mesmes de la beauté du marché, & Maison publique de la ville. L'hostel de Son Alteze estoit bien & richement tappissé, & meublé, veu le peu de loisir que les habitans auoient eu; & fut tres-bien logé & accommodé Son Alt. tous les Princes, Seigneurs, & Gentils-hommes

hommes de sa suite de toutes nations. Le soir se passa en festins, feux de ioye, par les ruës, & sur les tours & clochers, feux artificiels, & bruit de trompettes. Le lendemain 12. les Deputez des quatre membres de Flandres parlâs par la bouche du sieur Tayard pensionnaire de Gand, declarerent bien au long, la grande affection de tout le peuple de Flandres vers Son Alteze: & comme ils auoyent esté des premiers à enuoyer vers icelle, aussi qu'ils esperoyent estre des premiers à luy rendre tout tres-humble seruice & subiection. A quoy respondit Son Alt. comme de coustume, fort sagement. Son Alt. passa le reste du temps au ieu de paulme, avec Monsieur le Prince d'Orange, & puis avecq autres Seigneurs. Le 13. fut donné à Son Alt. le festin solemnel en la maison de la ville, où Sad. Alt. commanda de dresser les tables à propos, pour faire manger avec elle Messieurs les Prince Daulphin, Prince d'Orange, Conte de Lecestre, Prince d'Espino, Conte de Laual, My-Lords Hunsdon, & Hauward, estans par tout fort respectez & honorez les Seigneurs Anglois, tât pour le respect de Sa Majesté qui les auoit enuoyez, que pour la dignité de leurs personnes. Le festin fut fort bien serui de toutes choses, & principalement de patisserie & ourages de sucre: tellement que les François & Anglois confessoient, qu'en leurs Pais on n'a point accoustumé de voir de tels seruices. Le 14. Monsieur le Prince d'Orange voulut veoir le preparatif des vaisseaux qui debuoyent porter Son Alteze & toute sa suite, qui estoient en nombre cinquante quatre: & pourtant voulut aller à la Teste de Middelbourg. Ce qu'ayant entédu Son Alt. fist aussi le voyage. Le Ieudi 15. Son Alteze alla voir la ville d'Ermuyden, distante enuiron demie lieuë de Middelbourg: & scachant que les Seigneurs Anglois estoient allez veoir la ville de la Vere, appelé par les estrangers Camfer, à raison du traicct qui estoit autres fois en la ville de Camp, à present submergée, se mist aussi en barque, & s'y fist porter: où toute la compagnie fut fort bien receuë par les habitans, qui auoyent esté pris à despourueu. Le 16. Son Alt. estoit deliberée de s'embarquer. mais il se leua vn si grand brouillard que les mariniers conseillerent de ne se mettre en mer pour ce iour: tellement que l'embarquemēt fut differé iusques au lendemain, que Son Alteze avec toute sa suite fist voile. Son Alteze estoit portée par vn nauire peint entierement de ses couleurs, avec nombre de flagues, & pannonceaux aux armes d'Anjou: les

autres avec leurs pannonneaux ordinaires, tant redoubtez des Espaignols : lesdits pannonneaux aux couleurs de Monsieur le Prince d'Orange. La flotte pour ce iour vint iusques au trauers de Beerland, en l'Isle de Zuyt-beueland, où ils mouillerent l'ancre, & y passerent la nuit.

Le lendemain, estants arriuez de bonne heure à Lisloo, iecterent aussi l'ancre apres tiré force canonades du Fort, & des nauires de guerre qui accompagnoient Son Alt.

Son Alteze mist pied à terre, & coucha ceste nuit au logis du Capitaine, attendant le lendemain 19.

Ce fort de Lisloo est basti à trois lieuës au dessoubs d'Anuers sur vne pointe de dike ou chaussée en la paroisse de Lisloo. Le lieu est si commode, que d'un mousquet on peut aisément tirer d'un bord de la Schelde à l'autre; à raison que la riuiera & le flot de la mer, qui y passe tous les iours deux fois, viennent à se courber en cest endroit : tellement que ce lieu estant occupé par l'ennemi pourroit donner un empeschement de trop grande consequence à la nauigation : à raison dequoy suivant l'aduis & desfeing tracé par Monsieur le Prince d'Orange, ceux d'Anuers ont fortifié à tresgrāds despens ladicte place, qui a un grand tour, des grands boulleuers, rampars, & fosses : & est si bien fortifiée, & flanquée si à propos, & a l'eau tant à commandement, qu'elle est à present imprenable par la force.

Le lendemain, qui fut Lundi dixneuuesme de Feburier, partit Son Alteze pour faire son entrée en la tres-renommée ville d'Anuers.

L'EN-

II

L'ENTREE MAGNIFIQUE EN LA VILLE D'ANVERS, DE

MONSEIGNEUR FRANÇOYS, FILS DE

*France, & Frere unique du Roy, par la grace de
Dieu, Duc de Brabant, D'Anjou,
Alençon, Berri, &c.*



Nous spectacles & assemblées magnifiques, ceux qui en sont les auteurs, & qui les aduancent, essayent de donner lustre ; & faire paroistre le plus qui leur est possible ce qui se presente aux yeux de ceux qu'ils vueillent honorer, & de ceux qui conuiennent des autres lieux, pour auoir ce contentement d'en estre les spectateurs. Les historiographes anciens nous descriuent plusieurs grands triumphes & entrées superbes des Empereurs, Rois, & grâds Capitaines, & n'oublient d'inserer en leurs escrits les grandes despenses & sumptuositez, & tout ce qui a esté mis en monstre & euidence pour rassasier les yeux de l'assemblée. Et combien que l'or, l'argent, les pierres precieuses, tappisseries, draps de soye, de fin lin, diuersitez de vases, & de peintures n'y ayent esté espargnez, & que telles choses ayent enrichi lesdits spectacles: Si est ce qu'il n'y a rien qui plus ait apporté de lustre, de beauté, & de contentement, à telles assemblées; que la multitude & splendeur des armes, & de tout ce qui depend du faict de la guerre: comme machines, instrumens, monstre des villes & chasteaux battus, & pris à force sur les ennemis. C'est pourquoy en l'Empire Romain, qui a surpassé tous les autres, non seulement en victoires, en discipline militaire, & ordre politicq, mais aussi en sumptuosité & magnificence; combien qu'il y eust vne infinité de ieux publicqs & exercices apprestez par des plus grands Seigneurs du monde; qui non seulement n'y espargnoyent rien de ce qui estoit en leur puissance, mais aussi faisoient que les Villes & Prouinces qui leur auoyent quelque obligation, enuoyoyent ce qu'ils pouuoient recouurer de plus rare & exquis ausdits Seigneurs, pour s'en seruir aux spectacles qu'ils exhiboyent aux peuples. Si est ce que le triumphe a tellement emporté le prix par dessus les autres, que le mot de Triumpher qui en est venu, esté appliqué à tous faicts haults,


grands & magnifiques : ce n'est pas qu'és autres rien fust espar-
gné de tout ce qui pouuoit contenter les yeux d'un peuple auare,
ou assouvir le cœur sanguinaire de ceux qui ne prenoient plai-
sir qu'à voir espandre du sang, & mesmes bien souuent de ce-
luy des hommes deuant leurs yeux . Mais au triumphe
rien ne reluiſoit tant que les armes & la personne d'un grand
Capitaine victorieux, & neantmoins contentoit ſans compa-
raison d'aduantage, les ſpectateurs. Et pourtant meſme quand
on veut parler de la tresgrande grandeur de Rome, on l'appelle
Rome triũphante: qui ſignifie bien Rome riche, opulente, victo-
rieuſe, remplie de grand nōbre de grands Capitaines, & vaillans
hōmes de guerre. Mais ce nom eſt venu du grand nōbre de triũ-
phes qu'on y a veu du tēps des Corneilles, des Paules, des Claudes,
des Metelles, Pompees, Iules & autres . Il eſt vray que les autres
choſes ont vne tresgrande lueur & apparence, & chatouillent ie
ne ſçai cōment les eſprits repeus de la veüe de ces richesses, & de
nōbre infini de Lyons, Tygres, Pantheres, Ours, d'Eſcrimeurs à
outrance: Mais la veüe d'un bon nōbre d'hōmes armez de belles
armes, & en bel ordre, outre le contentement de la veüe, qui eſt
beaucoup plus grand que de voir des richesses, rauit auſſi en ad-
miration les eſprits, & pouſſe en eſtonnement le Spectateur, le
mettāt comme hors de ſoy, & le rempliſt neantmoins d'une ioyē
& contentement ſurpaſſant toute autre. Car comme és voluptez
du corps, celles ſemblent plus grandes qui alterent plus par leur
douceur, les ſens; auſſi eſt il du contentement de l'eſprit, qui eſt
d'autant plus grand quand l'admiration conioincte rauit auſſi
d'aduantage l'entendement, & le met comme hors de ſoy.


C'eſt pourquoy les grands perſonnages qui iugent mieux de ces
choſes que le ſimple populaire, quād ils diſcoursent de ce qui eſt
le plus beau & le plus deſirable à veoir: ils parlent bien d'or,
d'argent, pierreries, peintures, vaſes, tableaux & diuerſi-
té de meubles exquis; toutesſois ils paſſent par deſſus, & ne ſ'y
arreſtent point: mais quand on vient à parler de belles armes, de
beaux cheuaux, & de tout ce qui appartient à la guerre, ils ſ'y ar-
reſtēt: tellemēt qu'ils tiēnent pour tout reſolu, & cōfeſſē, qu'il n'y
a rien qui ſoit à cōparer en beauté & ſplēdeur à vne belle armée:
ſeulement ils viennent à debattre de la queſtion qui eſt encores in-
decise; à ſçauoir qui eſt le plus plaiſant à la veüe, de trois à quatre
beaux grands bataillons de gens de pied bien armez de belles ar-
mes luisantes, bien flanqués d'arquebuziers, l'artillerie à leur te-
ſte; ou

ste; ou d'autant d'esquadrons de gens de cheual; ou bien de deux à trois cens vaisseaux equippez en guerre avec leurs banderolles, & rangez comme s'ils estoient prests de combattre: Mais quant au reste des beautez, tous accordent bien qu'elles n'approchent en rien à l'un de ces trois, & encores moins aux trois ensemble, qui pourroit les veoir d'un œil, comme on racompte qu'on pouvoit veoir tout en un coup la grande armée de Xerxes tant à pied qu'à cheual, rangée en bataille; & les deux armées de mer, la Persienne & la Grecque, qui combattirēt pres de Salamine, où par la sagesse & vaillantise de Themistocles, les Grecs emporterent ceste victoire tant renommée. C'a esté à mon aduis la cause pour laquelle la reception, & ioyeuse entrée faicte en la ville d'Anvers à Monseigneur François, Duc de Brabant, a semblé si belle & si magnificque à tous ceux qui l'ont veüe, qu'il n'y a eu personne qui n'ait confessé n'auoir iamais veu la semblable. Et toutesfois plusieurs y assistoyent, tant de ces pais qu'estrangers, qui ont veu plusieurs assemblées superbes & magnificques, tant en la mesme ville, que plusieurs autres du Pais bas, & autres grandes villes és autres pais; comme Paris, Londres, Roüen, & Lyon; & neantmoins ceste voix estoit commune, Que ceste dernière surpassoit toutes les autres. Et combien (comme j'ay dit) que la ville n'auoit eu que six iours pour s'apprester, tellement qu'on ne pouuoit mettre en œuvre ny soye, ni or & argent battu ou traict, ni broderies, non pas mesme, en si peu de temps, faire bien un mediocre habillement neuf, ni quelque rare magnificence en statuës, colosses, arcs triumphauls, & autres spectacles; ains estoient les habitans cōtraints se seruir de ce qu'ils auoyent en main, & desia prest & en leur puissance. Es autres entrées on a veu à la verité beaucoup de richesses & magnificēces d'habits de Rois, Roynes, Princes & Princesses, Seigneurs & Dames, Bourgeois & bourgeoises: ce qui n'a point esté veu en ceste entrée, ores qu'il n'y eust rien de sordide; & qui ne ressentist bien la netteté & mundicie de ce peuple: mais il n'y auoit rien approchant de la sumptuosité des autres. Quant aux arcs triumphauls, chariots, figures & autres spectacles, ores qu'il y eust beaucoup d'inuentions ingenieuses, & cōuenables au tēps, Si est ce qu'on en a veu ailleurs qui les pouuoient égaller. Et quant au nombre de peuple, ores qu'il estoit grand; si est ce qu'il est notoire à un chascun, que celui de Paris le passe. Mais la seule raison de ce contentement vient principalement du grand nombre, n'estans guerres

moindre que de vingt mil hommes armez, si bien, & de si belles armes, leur ordre & obeïssance; & le peu du bruiet que tout ce grand peuple a fait; tellement que n'eust esté le tonnerre des artilleries, des trôpettes, clairons, haultbois & autres instrumens, il n'y eust eu non plus de bruit, qu'il y a en vn conseil de gēs sages. C'est à mon aduis doncq la seule, & vraye cause qui estoit grãdement aidée par la veuë de Monseigneur de Brabant representant ceste auguste antiquité, estāt reuestu du grãd mâteau, & couuert du chapeau Ducal, tellement qu'au milieu d'un si grãd peuple, & si bien armé que les trois meilleures villes de la Chrestienté ne pourroyent tant monstrier de belles armes appartenantes aux bourgeois, Son Alteze sembloit comme vne belle pierrerie enchassée au milieu d'un fin or. Et d'autant que ceux qui en ont esté spectateurs, comme ils n'ont peu estre par tout, & n'ont peu tout veoir, seront aussi bien aises d'entendre ce qui s'y est passé, & de contenter leur memoire, de ce qu'ils y ont veu, comme ils contenterent ce iour leurs yeux, & entendement; Et les nations estranges ausquelles est paruenue la renommée d'une si celebre journée receuront à plaisir, d'en entendre au moins la descriptiō; puis qu'ils n'en ont peu estre spectateurs: C'est pourquoy ce present escrit est mis en lumiere, afin que par iceluy vn chascun puisse estre satisfait: & aussi pour faire cognoistre à plusieurs qui ne l'auoyent pas voulu croire, les vns par inimitié, les autres par enuie, & autres par soupçons & deffiances de quel cœur & affection Monsieur le Prince d'Orange, & autres Seigneurs & nobles de Brabant, les bōnes, & petites villes, & nommémēt la tref-renommée ville d'Anuers a receu son nouveau Prince & Seigneur Souuerain.

Le xix. dudiēt mois au matin, Monseigneur le Duc d'Anjou partit de Lisloo, & fist voile vers la ville d'Anuers, ayant encores en sa troupe vingt vaisseaulx; les autres ayans gaigné le deuant en Anuers; tant pour se preparer, que pour autres affaires; & arriva enuiron les huit heures pres de la Neufue ville, s'aduançant tout le lōg de la ville, & laissant la Teste de Flandres à sa droite, & la ville à sa senestre, passa outre toute ladiēte ville, & le lieu où fut le chasteau. Cependant il ouit iouër tout le canon de la part de la ville, qui regarde la riuere, & de plusieurs nauires qui estoient à l'ancre: & vit tous les Quais remplis de gens de guerre bourgeois bien armez, qui lui firent la salue, & fut respondu par les nauires de guerre, qui l'accompaignoyent, conduits par le
Sieur





Sieur de Tresslon, & Viceadmirauls, & plusieurs Capitaines de Flessinghe: & ainsi mist premierement pied en la terre de Brabant au village nommé le Kiel, qui est à la portée du canon de la ville d'Anuers. Les Estats de Brabant, le Magistrat de la ville, & plusieurs autres Estats venuz en tel ordre, & à cheual, iusqu'au dit lieu; marchants deuã eux, leurs trompettes, Huissiers, & Herauts d'armes armoyez des armes de Lothier, Brabant, & Lembourg, estoient attendants à pied sur le bord, pour receuoir Son Alteze, luy declarer la bonne volonté & affection des Estats & du peuple. Mais la foule estoit si grande du peuple, qui s'estoit rendu audict lieu pour voir le Prince qu'ils attendoyent pour leur Duc; & d'autre part les empeschemens donnez pour le desembarquement qu'il fut trouué meilleur, suiuant l'aduis de Monsieur le Prince d'Orange, que lesdits Sieurs allassent attendre Son Alteze sur le Theatre, qui luy estoit préparé. I.

Ce Theatre estoit dressé vers le coing du Chasteau, ayant l'ouerture vers la ville: tellement que S. Alt. y estant, il pouuoit d'une veüe descouurir la ville & le chasteau, considerer les contrescarpes, les beaux fossez remplis d'eauë profonde à fond de cuue, reuestus des deux parts de pierre de taille, les grands & beaux bastions, les murailles belles à veoir & espesses, & des larges rampars ornez d'arbres plantés; tellement qu'il semble d'une petite forest. Son Alteze fut conduicte sur ce Theatre, l'accompagnants Monsieur le Prince Daulphin fils vnicque de Monsieur le Duc de Montpensier, Monsieur le Côte de Lecestre & autres Seigneurs Anglois representans la Roynie d'Angleterre, Messieurs les Princes d'Orange & d'Espinoy, Monsieur le Conte de Laual, les My-Lords Anglois, le Conte de Chasteauroux, & autres Barons, Seigneurs & Gentils-hommes en grand nombre, & les Sieurs du Magistrat, & des Colleges de la ville d'Anuers.

Les Sieurs Estats de Brabāt attendans sur ledit Theatre se mirent en debuoir de descendre, & aller rencontrer Son Alteze: quoy voyant elle mist pied à terre. Et quant à Monsieur le Prince d'Orange, il s'aduança pour se ranger avec lesdits Estats: comme l'un des principaux Seigneurs & Barons du Duché de Brabāt; & apres auoir salué & baissé treshumblement les mains à S. A. se mirent à remōter les degrez avec S. A. accompagnée des Princes & Seigneurs François & Anglois. & estans montez se rangerent d'une part & d'autre. Il y auoit vne chairē couuerte de drap d'or, sur laquelle s'assist Son Alt. & sur le Theatre vn d'ais pareillement de drap II.

de drap d'or, & tout le Theatre tapissé. Au front du Theatre, & au plus haut estoient les armes du Marquisat du S^t Empire: & vn peu au dessous, à la droicte, celles de Brabant avec la ceinture de fruiçts: & à la fenestre celles de la ville d'Anuers. On aduança deux banderolles de soye azurée avec les armes d'Anjou: & estoient escrits en vn compartiment ces vers:

*Quò tuate virtus effert, clarissime Princeps,
Cui candor, cui cana fides vestigia servant,
Ingredere ô, magno ut Belga sub nomine tandem
Respirent, Populiq, Parens assuesce vocari.*

Lesquels vers en François peuuent estre ainsi rendus:

*Prince treshaut, auquel la foy, & la candeur
Sont gardez de ses pas, entre en ceste grandeur,
Où monte ta vertu. Que sous toy la Belgie
Respire, appren le nom du Pere à la Patrie.*

Tous ayants pris place, & le silence faict, les Estats de Brabant commencerent leur harangue par la bouche du S^r de Hessels, Docteur és droiçts, Conseillier & Greffier des Estats de Brabant, telle que le sommaire ensuit:

Q V E les Barons, Nobles, & Deputez des Chefues, & autres bonnes villes, representâts les Estats de ce Duché & Pais de Brabant, ayans maintenant cest heur de veoir pres d'eux, & de regarder face à face ce grâd Prince; auquel, apres Dieu, ils auoyent remis entierement l'esperoir de leur deliurance, & reſtabliſſement de leur repos & liberté ancienne, louoyent grandement le Seigneur tout puissant, qui leur en auoit fait la grace; le prenant en assuré tefmoignage, que de sa bonté & prouidence infinie il ne les auoit mis en oubly, ni abandonné leur iuste querelle; ains choisi Son Alteze pour defenseur de son peuple, & administrateur de sa iustice: afin qu'à luy fust la gloire, & à Son Alt. l'honneur, & le renom d'auoir par les rayons de sa grandeur, prudence, & magnanimité fait esgarer les brouillards, & tout ce qui estoit nuyſible à leur estat, & y fait renaistre la splendeur de leur prosperité premiere, iadis cognüe à toutes nations; Remerciâs quant & quant treshumblement Son Alteze de l'amour & affection singuliere, que de son seul mouuement & vertu heroïque, il luy auoit pleu leur continuer iusques à ores: Nonobstant toutes les trauerses, & machinations que les artificieux auoyent ſceu donner au progres de leurs affaires: & qu'ils n'ignoroient que pour leurs calamitez

& mi-

& miseres il n'y estoit aucune chose entrevenue qui eust peu rendre leur cause plus fauorable ou l'aduancer. Ce qu'ils reputoyent & reputedoyent à tousiours pour vn exemple non-pareil d'extrême moderation & rare constance; dont, & pour tant d'autres bienfaicts & benins deportemens de Sadite Alteze enuers eux, leur seroyent & demeureroient perpetuellement redevables à les recognoistre de toute fidelité & obeissance, comme ils se trouuoient appareillés à se rendre (avec la grace de Dieu) ce iourd'huy, ses humbles vassaux & subiects.

Et combien qu'ils ne doubtoient que Son Alteze auoit cognoissance bien ample & entiere satisfaction, non seulement des causes generales qui auoyent meu les Estats generaux des Provinces vnies des Pays-bas, de reclamer son secours & se ietter entre ses bras: mais aussi des occasions particulieres que les Estats de ce Duché & Pays de Brabant auoyent, de quitter l'obeissance du Roy d'Espaigne; Toutesfois pour en renoueller sommairement la memoire à Son Alteze, & luy confirmer ceste sienne sainte resolution & entreprinse haute, sur ce bastie; aussi pour rendre aucunement raison aux Princes & Seigneurs avec toute la compaignie (qui à l'honneur de Son Alteze estoient venus leur faire ce bien, d'assister à la solemnité de sa reception) de toutes leurs actions; à ce, qu'à ceste sienne entrée, qui de tout tēps s'estoit appelée, Ioyeuse, ils prestassent d'autant plus de bienvueillance & gayeté de cœur, diroyent seulement, Que tandis que les Ducs de Brabant, & signamment, depuis que le Duché dudit Brabant est tumbé és mains des Ducs de Bourgoigne, & autres tref-illustres ancestres de Sadite Alteze, s'estoyent eux mesmes addonnez à gouuerner leurs subiects dudit Brabant; leurs faisans paroistre qu'ils les aimoyent, & ne nonchaloyent pas, ils en auoyent tiré si grandes & notables commoditez & seruices, que leurs noms & puissances en furent bien souuent admirables, & quelque fois redoubtées des plus grands Monarques, Roys, & Republicques de la Chrestienté: dont leurs guerres & cōquestes faisoient foy, sans que, comme de chose trop familiarement cognuë par les histoires, il fust besoing d'en faire discours en celieu & tēps-là, dedié à chose plus grāde. Mais depuis que leurs Ducs & Princes, ou par autres allechemēs ou trop empeschez en autres Pais & Seigneuries, auoyent cōmencé à les abandonner pour vn temps, & puis les oublier plus longuement; les prostituans au plaisir, volonte, & aucunes fois aux conuoitises

& auarice de leurs ministres: dont finablement le Roy d'Espagne auoit couronné l'œuure, les ayant dedaigné & laissé vefs, & orphelins de sa presence plus de vingt ans; Il estoit aduenue qu'apres auoir alteré & changé quasi tout l'estat du Pais, & commis les offices à gens qui selon les loix & priuileges du Pais n'en estoient capables, ou bien à ceux qui en donnoient le plus; l'insatiable conuoitise, haine, & immodérée tyrannicque domination des Espaignols non contents de cela, s'estoit à la fin (apres auoir abusé selon leurs passions de tout l'Estat publicq) aduancée à telle outrecuidance, que de se saouller du bien & substance des particuliers habitans, du labour & sueur du pouure, voire de la chasteté de leurs femmes & filles, & (pour se parfaire en toute abomination & cruauté) des vies & sang, de ceux, qui ne taschoient qu'à leur complaire. Dont à la fin ce grand Dieu & iuste, qui a soing des siens, s'estoit offensé, & auoit fait souuenir à ce peuple, iadis valeureux de son estre & liberté premiere, leur rendant & le vouloir, & le courage de la maintenir, telle qu'ils l'auoyent receuë de leurs ayeuls.

Que cela ne s'estoit peu faire mieux, que par l'election que lesdits Estats de Brabant, avec les autres Prouinces vnies, auoyent faicte de la personne de Son Alt. pour leur Prince & Seigneur: reduisants le tout à son ordre premier, ayants premierement cherché, mais en vain, tous remedes à leurs maux, & au desbordement de l'estat és causes & sources d'icelluy.

Que leurs Ducs iadis auoyent esté valeureux, preux, & puissans, ayants faict expeditions & exploicts de guerre memorables, & entre autres: Qu'ils auoyent par ci deuant choysi vn Duc d'Anjou; Qu'ils n'estoyent moins belliqueux & grands guerroyers; cōme leurs conquestes & dominatiōs le tesmoignoient.

Qu'ils auoyent eu leurs Princes debonnaires, doux, benins, familiers, & faciles enuers leurs subiects, Que Son Alteze leur auoit en cest endroit ia donné tant de preuues de sa douceur, verité & rondeur, qu'il leur sembloit desia quelque ancien Duc de Bourgoigne leur estre resuscité. De sorte qu'en saditte Alteze seule, ils se persuadoient fermement auoir recourré tout ce que les Ducs de Brabant, d'Anjou, & de Bourgoigne leur pouuoient auoir laissé de bonne memoire.

Puis doncques ne restoit autre chose que de passer plus outre, & acheuer ce chief-d'œuure, qu'il auoit pleu à ce souuerain Dieu ce iourd'huy mettre à son Alteze, & ausdits Estats en main, Que
de leur

de leur part ils se trouuoient prompts, & resoluz, pour luy prester l'hommage, la fidelité, deuoirs, & obeïssance, que loyaux & bons vassaux & subiects doiuent à leurs Princes droicturiers, tels qu'ils ne doubtoient & confioient en Dieu que Son Alteze leur feroit & promettroit solemnellement par son serment à Dieu de leur estre.

A quoy son Alteze respōdit en substance, Que ne veuillant entretenir lesdits Estats de long propos, ains seulement se souuenir de l'honneur & affection qu'ils luy auoyent voulu porter, l'ayants entre tant d'autres grands Princes choisi, pour les deliurer de l'oppression & tyrannie Espaignolle, & les regir selon leurs loix, coustumes & priuileges, il les en remercioit bien fort, & les asseuroit, que la iustice & equité de leur cause, leurs honnestes deportemens en son endroit, & l'amour qu'ils luy monstroyent, l'auoit faict resouldre à embrasser leur protection, & re-stablissement de leur liberté ancienne, & d'y exposer tous les moyens que Dieu luy auoit mis en mains, & ceux qu'il plairoit au Roy son Seigneur & frere, & à la Royne d'Angleterre de sa faueur luy prester, iusques à n'y espargner son sang & sa vie propre.

Cela fait, ledit Hessels declara à Son Alt. que lon auoit de coustume, de publier tout hault deuant le peuple en langue Thioïse, les poincts & articles de la Ioyeuse entrée, que les Ducs de Brabant sont tenus de promettre & iurer à leur reception.

Et ores que lon tenoit preste la translation Françoisse d'iceux articles, pour la reciter apres le Thiois article pour article; si trouua Son Alt. à l'aduis de Mondit Sieur le Prince, conuenir, que pour gagner temps (puis que le iour s'aduançoit fort, & qu'il en auoit ja eu communication au parauant) de ne les lire qu'en Thiois. ce que fut faict par ledit Hessels avec la preface nouuelle adioustée ausdits articles, contenant en bref les occasions & raisons de ce deduit.

Après la lecture desdits articles, fut demandé à Son Alteze si elle en auoit contentement, & si elle estoit contente de les iurer, ou bien qu'il luy pleust d'en auoir autre satisfaction? Surquoy icelle dist à mondit Sieur le Prince d'Orange, Que ayant veu lesdits articles, & en conferé avec luy, au nauire venant de Zee-lande, il s'en tenoit bien satisfait, & estoit content de les iurer.

Laquelle declaration fut quant & quant publiée: Et que Son Alteze desiroit, que tous sceussent, & s'en tinssent bien satisfaits, que non-obstant que la lecture desdits articles fust faicte seule-

ment en langue Thioise, il les iureroit toutesfois de son bon aduis, avec meure deliberation & cognoissance bien certaine.

Et de mesme recita ledit Hessels au peuple en langue Thioise le premier serment, que les Ducs de Brabant d'ancienneté ont accoustumé, & sont tenuz de faire de l'observation desd. articles.

Et presentant le liure, auquel il est contenu, à Messire Thierry de Lief-velt Chancelier dudit Duché, prononça iceluy le mesme serment traduit en langue Françoisse, & le prononça fa-dicte Alteze apres luy de mot à autre.

Lors reprenant ledit Hessels le liure, fist entendre au peuple, que les Ducs de Brabant faisoient vn autre & deuxiesme sermēt aux Barons, Nobles, Villes, Franchises & tous habitans & subiects du pais, de leurestre bon & droicturier Prince, & ne les traicter à sa volonté, ni par voye de faict, ains en droict, iustice, & selon leurs Priuileges. Lequel se recita aussi en langue Thioise: & rendant le liure audit Chancelier, le prononça Son Alteze apres luy, comme le premier.

Puis fut apporté le manteau & chapeau Ducal, qui estoient de veloux cramoisi: ledit manteau trainant en terre, l'vn & l'autre fourrez d'hermine mouchetées, à grāds rebras. De lors Monsieur le Prince d'Orange remonstra à Son Alteze, qu'il luy conuenoit d'estre vestu de ces habits; & Son Alt. demandant s'il luy faudroit porter en la ville? Fut respondu qu'Ouy, & que c'estoit l'habit solemnel ancien des Princes & Ducs de Brabant. A quoy s'estant accordée Son Alt. ledit Seigneur Prince luy vestit premierement ledit manteau, & luy fermant le bouton; dist, en ces mots: Monseigneur il faut bien serrer ce bouton; affin que personne ne puisse arracher ce manteau à V. Alt. Et puis luy mist le chapeau sur la teste, & lors luy dist: Monseigneur, ie prie Dieu que vous puissiez bien garder cest habit: à present vous pouuez estre asseuré d'estre Duc de Brabant.

Lors luy declaira ledit Hessels, que la coustume portoit que maintenant lesdits Estats luy prestassent en ceste qualité le serment reciproque de fidelité. Et publiant au peuple le formulaire d'iceluy serment, le stipula en apres ledit Sieur Chancelier, & le prononçoient lesdits Barons, Nobles & Deputez de mot à autre apres luy, comme les precedens, faisant derechef la reuerence & hommage de fidelité & obeissance.

Apres les serments faicts mutuellement par Son Alt. & par les Estats de Brabant, Son Alt. estant vestu de son manteau Ducal, Mes-

Messieurs du Magistrat commanderent à leur Conseiller & Pensionnaire le Sieur Vander-Werck se trouver sur le Theatre pour faire la proposition au nom de la Ville d'Anvers, & Marquisat du Saint Empire. Ce qu'il fist, comme il ensuit:

Serenissime Seigneur & Prince:

LE Marcgräue, Amman, Bourguemaistres & Escheuins, Thresoriets, & Receueurs, les Chiefs de la bourgeoisie, & Maistres des quartiers, les Doyens, & Anciens des mestiers: ensemble les Colonels, Doyens des Guldes, & Capitaines de ceste ville; ont esté tref-ioureux d'entendre l'heureux arriuement de V. Alteze en l'Isle de Walchren, comme ils ont bien amplement, & en toute humilité & reuerence fait représenter à V. Alteze par Deputez à cest effect vers icelle enuoyez. Et voyant maintenant V. Alteze non seulement arriuée au Pais de Brabât, mais aussi receuë pour Duc, & pour leur Prince & Seigneur, leur ioye auparauant conceuë est de beaucoup augmētée, & renduë quasi entiere, & parfaite; Confians que par sa venuë sera vne fois mise fin aux desolations, calamitez, & miseres, esquelles ce Pais a esté reduict par l'inique domination passée, & par la plus inique & iniuste guerre, laquelle les ennemis continuent pour acheuer de ruiner le Pais avec tout genre de calamitez & oppressions; dont ils se peuuent aduiser. Et remercient treshumblement Vostre Alteze de la peine & trauaux, lesquels il luy a pleu prendre pour se trouuer en ce Pais: rendent infinies graces à Dieu, de ce qui leur a donné, & enuoyé vn Prince, qui a non seulement le moyen, & la puissance, mais aussi l'affection & volonté de les défendre contre tous ennemis; & les regir & gouverner en toute bonne police, & iustice selon les Priuileges, Loix, & coustumes du Pais. Car combien que se soyent ioincts aux autres Estats de Brabant, & avec les Estats generaux du Pais-bas; & que conioinctement avec eux ayent pris les armes: Si estce qu'à cela n'ont esté meuz pour s'exempter, & soubstraire de la iuste domination d'un Seigneur, & Prince: mais seulement pour maintenir leurs liberrez, droicts, & priuileges anciens; & estans gouvernez selon iceux, & demeurans en toute deuë obeissance, pouoir venir en bon repos, paix, & tranquillité: de sorte qu'estiment auoir obtenu le comble de leurs desirs & felicitez: Ayant au bon Dieu par sa grace & misericorde pleu inspirer à V. Alt. de prendre la Seigneurie des Pais-bas, Duché de Brabant, Ville d'Anvers, & Marquisat du Saint

Empire. Car l'ayant Dieu faict naistre si grand Prince, & frere vnicque d'un si puissant Roy, Ne doubtent aucunement que V. Alt. par la grace de Dieu, trouuera bien tost les moyens de deliurer ces Pais de ceste miserable guerre, en laquelle ils ont esté si longuement plongez. Le Marcgraue, Amman, Bourguemaistres, & Escheuins & autres membres de ceste ville n'estiment estre besoing de repeter les causes de la guerre, & l'equité de leurs resolutions, puis que par les Estats generaux estoit par diuerses fois assez amplement deduiete: laquelle aussi estoit cognüe, & notoire à tout le monde, & en beaucoup de sortes par V. Alteze approuuée. Remerciant au surplus en toute humble subiection, & reuerence de ce qu'il a pleu à V. Alt. accorder & promettre l'entretènement de leurs priuileges, loix, & coustumes, & mesmes les articles compris au Contract principal, & en la Ioyeuse entrée de ce Duché de Brabant. Aseurant Vostre Alteze que ceux de ceste Ville d'Anuers, & Marquisat du Saint Empire vous seront, & demeureront treshumbles subiects, & qu'ils employeront corps & biens, & tout ce qu'est en leur puissance pour l'accroissement de vostre honneur, & gloire.

Et son Alteze respondit fort benignement, Qu'il remercioit lesdits Sieurs de leur bonne volonté & affection vers luy: Que son intention estoit de leur faire paroistre par les effects le desir qu'il auoit de gouverner & regir le Pais en bonne police, & iustice: le tout fort amplement, & de tresgrande grace.

Cela fait, led. VanderWerck se tournât au peuple, crioit à haute voix, Que Son Alt. Duc de Brabât, Alençon, Anjou, Berry, &c. feroit le Serment à la ville d'Anuers, & Marquisat du Saint Empire. Qu'on prioit Dieu que par vn tel, & si solemnel acte son nom fust sanctifié, la seureté & prosperité du Pais procurée, à l'accroissement de l'honneur & gloire de Sadite Alteze.

Et apres fut le Serment, lequel feroit son Alteze, par ledit Vander-Werck leu au peuple, le tout en Flameng.

Ce qu'estant fait, Mōsieur l'Amman leut le mesme Serment à Son Alteze en François: lequel fut par son Alteze fait & presté en ses mains: ores que Monsieur le Bourguemaistre de la ville d'Anuers soustint qu'à luy appartenoit de receuoir ledit Sermēt.

Et le mesme Bourguemaistre, assauoir le Sieur Philippe de Schoonhouen se presenta alors deuant son Alteze, luy donnant vne clef dorée en signe de subiection, & que Son Alteze pourroit disposer de la ville comme d'une ville sienne. laquelle clef fut
audit

audit Bourguemaistre par Son Alt. rendue, declarant fort gracieusement qu'il s'asseuroit que ledit Bourguemaistre & tous autres bourgeois, & inhabitants de la ville la luy garderoient fidelement, comme auoyent faict iusques alors.

Toutes les solemnitez parfaites & accomplies, les Herauts de Brabant & Lotrick, ou en vulgaire Brabant Wallon, Lothier, qui est à dire, Lotharingie, ou la vraye Lorraine, crierent à haute voix VIVE LE Duc de Brabant. Et ayans sonné les trompettes firent largesse, iettans aux assistans grand nombre de pieces d'or & d'argent. Ces pieces estoient de deux sortes: les vnes auoyent d'une part l'effigie de Monseigneur le Duc de Brabant: les autres les armoiries d'Anjou & de Brabant, & estoit imprimé sur les bords FRANÇOIS DE FRANCE DVC DE BRABANT: de l'autre part estoit à toutes la devise du Soleil avec son inscription FOY ET DISCVTIT: qui est la devise ordinaire de Son Alteze. Hors de la ville y auoit deux regiments de Bourgeois, faisant le nombre enuiron de trois mil hommes, qui estoient en bataille: lesquels il faisoit beau veoir pour les belles armes, & enseignes desployées, qui ne bougerent de leur place iusques à ce que toutes les ceremonies furent acheuées, & que Son Alteze fust entré dedans la ville. Outre cela y auoit vn nombre infini de peuple de la ville, & plusieurs estrangers qui estoient fort esbahis, & principalement les François, de veoir leur maistre en cest appareil, & en parloyent diuersement, comme on faict de choses nouuelles, & non veuës: Mais quand ils entendirent que c'estoit l'habit Ducal, & que Son Alt. marcheroit en cest habit marque de l'antiquité, & duquel vsent encores les Electeurs du Saint Empire en leurs grandes ceremonies, furent estonnez; & leur sembla ce Prince d'une forme plus auguste qu'auparauant: & fut dit assez haut par vn d'iceux: Puis que c'estoit le manteau Ducal, qu'il cousteroit la vie à cinquante mil François deuant qu'il fust osté de dessus Son Alt. Les ceremonies acheuées & estant Son Alt. descendu de dessus le Theatre, monta sur vn courfier de Naples de poil blanc, qui estoit couuert d'une housse de veloux à grandes broderies d'or: & ainsi Monseigneur le Duc de Brabant commença à marcher vers la tres-renommée & tres-opulente ville d'Anuers: & fut conduit le long de la contrescarpe, iusques à la sumptueuse & magnificque porte appelée Keyfers-porte, ou Porte de Saint George; & ainsi entra en sadite tresbonne ville d'Anuers.

L'ordre

L'ordre tenu à ladicte entrée fut tel:

PREMIEREMENT marchoyent les deux Sergeants Maiors de la ville, qui estoient suiuis de deux Messagers avec les armes de la ville: puis suiuyoient les Trompettes avec les armes de Brabant.

La premiere compaignie fut des Marchants Allemans, appelez communement Oostrelins, bien montez & habillez à la façon Allemande:

Les Marchants Anglois suiuyoient en fort bel ordre, tous vestus d'une cazaque de veloux noir, toutes d'une façon:

Les Colonels & Capitaines de la ville:

Après plusieurs Gentilshommes tant du País que des deux autres nations:

Après le corps de la ville, à sçavoir les Wickmaistres,

Les Doyens:

L'ancien Magistrat,

Maistres des Orphelins,

Escheuins subalternes,

Escheuins de la Halle,

Huissiers,

Secretaires, Greffiers, & Pensionnaires:

Receueurs & Tresoriers,

Escheuins:

L'Amptman, & les deux Bourguemaistres,

Estans tous vestus d'un manteau de veloux noir, &
d'une mesme façon.

Les Trompettes des Estats de Brabāt, Lembourg, & Lothier.

Après suiuyoient lesdits Estats en tel ordre:

PREMIEREMENT marchoyēt les Deputez des villes subalternes:

Les Deputez de la ville d'Anuers:

Les Deputez de Bruxelles:

Les Nobles de Brabant:


Le Chancelier de Brabant, & au dessus de luy Monsieur L'Amoral d'Egmond frere au Sieur Conte d'Egmond, Baron de Gasebeke.

Grand nombre de Seigneurs du País, François, & Anglois bien montez & richement habillez.

Les Suisses avec leurs tambours & fiffre.

La maison de Son Alteze; estās meslez avec aucuns des principaux de ladicte maison quelques Seigneurs Anglois.

Puis



Puis marchoyent Monsieur le Conte de Laual ayant à dextre & à senestre My-Lords:

Monsieur le Prince d'Espinox ayant à dextre My-lord Hunf-don, & à senestre My-Lord Hauward:

Monsieur le Prince Daulphin, ayant à dextre Monsieur le Conte de Lecestre, & à senestre Monsieur le Prince d'Orange:

Le Marcgraue d'Anuers à teste nuë portât le bastõ de Iustice:

Le Baron de Merode Sieur de Peterfon, faisant pour ce iour l'Estat de Mareschal de Brabant, & portant l'espée nuë deuant Son Alteze:

Puis marchoit SON ALTEZE monté & vestu comme dessus: Suiuoyt Monsieur le Conte Maurice de Nassau, fils de Monsieur le Prince d'Orange, ayant à sa dextre Monsieur le Conte Philippe de Nassau, nepueu audit Seigneur Prince, fils de Monsieur le Conte Iean de Nassau; à sa senestre, My-Lord Sheiffeild.

Son Alteze estoit gardée des compagnies des Guldes; c'est à dire des anciennes Confrairies des Archers, Arbalestriers & Arquebusiers, avec si belles armes, qu'il ne s'en trouue de plus belles: qui luy estoient allez au deuant, & iceux l'environnoyent en gros sans ordre, cõme sont les fleurs de lis sur vn manteau Royal.

Les gardes Françoises de Son Alt. suiuoyent aussi en gros: puis les gardes à pied, de Monsieur le Prince d'Orange.

Et apres en fort bel ordre les vingt enseignes de Bourgeois, qui auoyent esté en bataille hors de la ville.

Sur ladicte Porte par où entra Son Alt. y auoit vn compartiment à la Doricque, dedans lequel estoit escrit: III.

FRANCISCO Henrici II. F. Henrici III. Galliarum Regis FR. vnico, singulari Numinis prouidentia ad Amplissimum Belgij Principatum vocato atque in Brabantia Ducem Sacriq; Imperij Marchionem, quod felix ac faustum sit, inaugurato Principi suo exoptatiss. hanc urbem sibi deuotissimam auspiciatissimè ingresso votis fauentes,

S. P. Q. A.


Qui signifie: A François fils de Henri second, frere unique de Henri troisieme Roy de France, appelé à la souveraine principauté des Pays bas, & Duc de Brabant, & Marquis du Saint Empire inauguré, à Son Prince tres-desiré, entrât tres-heureusement, ses tres-deuots, fauorisants de leurs vœux,

LE SENAT ET PEUPLE D'ANVERS.


D

Le

IIII. LE CHARIOT de la Pucelle d'Anuers ne peut sortir de la ville, pour n'auoir moyen de destourner; & pourtant attendit S. A. deuant la porte, au dedans de la ville. Ce chariot estoit appellé CHARIOT DE L'ALLIANCE, qui portoit la Pucelle accoustrée de satin rouge & blâc, qui sont les couleurs d'Anuers: en sa main senestre auoit vne branche de Laurier, & sur sa teste vne couronne aussi de Laurier, en signe de Victoire contre les tyrannies du Roy d'Espaigne, & de la deliurance que le peuple espere par le moyen du nouueau Prince, bon, fidele, protecteur & victorieux: auquel de l'autre main presentoit les Clefs, suiuant les vers escrits sur sa teste, qui suiuront cy apres: Deuant elle estoient les armes du Marquisat du Saint Empire: à sa dextre estoit Religion habillée en Sibylle, portant en sa main vn liure ouuert, nommé, LA LOY ET L'EVANGILE: en l'autre main vne espée nommée LA PAROLLE DE DIEV: à la senestre estoit Iustice, tenant la balance & l'espée en sa main: sur la balance estoit escrit, OVI ET NON. Deuant la Pucelle estoit assise Concordia, vestue de blanc, iaulne, & orangé, ayant sur son bras vn escu, auquel estoit peint vn sceptre couronné, avec deux petits serpents, & au dessoubz deux columbes; le tout enceint d'une couronne d'oliue, & signifiant Louable gouuernement, avec Prouidence. Elle portoit vn heaume en teste, signifiant Sageſſe: en la main vne lance, dont la banderolle portoit d'un costé les armes d'Anjou couronnées d'Oliue, de l'autre vn aigneau avec vn loup, le lyon avec le beuf: pour monſtrer le grand repos attendu ſoubz ce Prince, tant en la Religion qu'en la Police. A la main droite de Concorde estoit Prudence: à sa senestre, Force: & au milieu du Chariot estoit vne colonne richement faicte à la Corinthiacque: sur icelle estoit vn cœur tenu de deux mains armées, ayant des aisles, signifiant Vnion, Foy, & Force; & vne espée entortillée de deux serpens, ayants leurs queuës à leurs oreilles; donnant à entendre le gouuernement prudent, & les oreilles estouppées aux flatteurs. Au pied de la colonne vn compartiment avec les armes d'Anjou, & de Brabant; en la poitrine du Lyon de Brabant estoient les armes du Marquisat du Saint Empire, & de la ville d'Anuers. Sur les armoiries estoit escrit FOEDVS. Sur les coings du Chariot estoient deux figures armées, le morrion en teste, accoustrées d'orangé, blanc, & bleu: l'une nommée Fides, l'autre Vigilantia. En la main auoyēt vn escu, auquel estoient peintes deux espées croisées, & deux columbes avec vn trouſseau de fleſches, signifiants







fians Vnion. Sur l'vn des escus estoit escrit DEFENSE: sur l'autre OFFENSE. Chascune desdittes figures ayants vne banderolle de soye d'azur: en l'vne estoit le Pellican qui se tuë pour les siës: en l'autre vne geline couuant ses pouffins.

Sur la teste de la vierge estoient ces vers.

*Principis impietas, furor, & vesana tyrannis,
Quas olim certo dederam sub fœdere clauas,
Restituere mihi. tu has, ô clarissime Princeps,
Accipias fato meliori atq; omine fausto:
Hoc pietas meruit, virtus hoc tanta meretur:
Ter felix patrios cui cedit Belgica fasces,
Felices tanto tuti sub nomine Belgæ.*

Lesquels vers en François peuuent estre ainsi rendus:

*L'impieté du Duc, tyrannie & fureur
M'ont rendues ces clefs, que sous accord certain
Données luy auoy: Que d'un meilleur destin
Ta main les puisse prendre: & ainsi ta vaillance,
Et pieté ces clefs en ta puissance ont mis.
Belges trois fois heureux, qui ont leur chef soumis
Sous le nom tres-heureux de ce tige de France.*

Six Gentils-hommes de la ville l'attendoyent à la porte avec V. le ciel de drap d'or frizé: lequel deslors ils tindrent & porterent sur le chef de Son Alteze qui commença en l'ordre que dessus, à marcher dedans la ville.

Toutes les rues, depuis la porte iusques à son logis, estoient bordees de gens armez, avec leurs enseignes, fiffres & tambours: Les officiers avec la rōdelle dorée, & l'espée en la main: & tout le reste armé des plus belles & meilleures armes qui se puissēt veoir.

Son Alteze continua son entrée iusques au coing de la rue nommée Gasthuys-strate, pres l'Eglise S. George, où estoit dressé vn spectacle en forme de tableau, grand & hault esleué: lequel VI. auoit esté faict par vne des Chambres des Poëtes Tragicques & Comicques, appelez vulgairement Rhetoriciens, ladicte chambre appelée le Souffi, ou cōme aucuns l'appellēt le Sol-suit, pour estre vne fleur suiuant le Soleil: & ladite chambre a pour sa diuise *Accroissant en vertu*. Ledit spectacle ou tableau auoit trois compartiments: le premier estoit du premier de Samuel chap. 15. où Samuel remonstre à Saul sa desobeissance, & en signe que le Royaume seroit arraché de sa maison, & donné à vn meilleur,

luy rompt vne partie de son habillement : Signifiant que la Seigneurie de ces Pais est ostée au Roy d'Espaigne, pour ses sermens violez par tyrannies, & concussions abominables. En l'autre comment il est commandé par Samuel à Isai pere de Dauid, d'amener ses enfans, & que Dieu en establiroit l'un; à sçauoir le plus ieune, qui estoit Dauid, pour Prince du peuple. Au troisieme, comment Dauid estant oinct, combattit & desfist Goliath. Le Tiltre & la superscription estoit à la Phrygienne, où estoient escripts ces vers:

*Abstulit ut regni Dominus moderamina Sauli,
Et reprobum sancti priuauit numinis aura,
Præfecitq, suo Regem Dauid a popello;
Sic modò depulsis patria regnòq, tyrannis
Dux generose tuo voluit nos marte tueri.*

Qu'on peut ainsi exposer en François:

*Comme Dieu arracha à Saul la couronne,
La donnant à Dauid; ainsi le ciel te donne
Ceste espée Ducale, en ta vaillante main,
Pour defendre les tiens du tyran inhumain;
Lequel pour sa fureur, sa rage & tyrannie
Nous auons dechassé hors de nostre Patrie.*


Le front & couronnement orné de banderolles, armoiries, torches & flambeaux portoit la deuise de Son Alt. FOVET, ET DISCVTIT. Au pied dudit tableau estoit Discordia en prison close de traillis, où elle estoit tourmentée de Furies & de Serpens, avec les vers:


*Discutit exortas Dux Alençonius iras
Iuppiter in gremio quem Deus vsque fouet.*


Qu'on peut ainsi rendre:

*Les rages & fureurs montées
Iusques au ciel, sont escartées
Par l'œil & le regard serain
De ce grand Duc, & nouveau Prince,
Que Dieu gardant ceste Prouince,
Maintient tousiours dedans son sein.*

VII. Son Alteze passa outre iusques au lieu nommé les Trois-coings tirât vers la rue nommée Huyuetter-straet, où estoit vn autre magnifique spectacle avec les armoiries, torches & flambeaux: Il auoit







auoit esté fait par vne autre Chambre des Rhetoriciens appelez les Peintres ou Violiers ayans pour leur deuise *Par candeur assemblez*, où estoit depeinte l'estroite confederation de Dauid & Jonathan: signifiant l'integrité du serment mutuel de Son Alt. & des Estats de Brabant, Magistrat, Membres, Colonels, & Capitaines de la ville d'Anuers. En ce Tableau estoit escrit en vn compartiment à la Phrygienne ces vers:

*Aduersus veluti Saulis promiserat omnes
Tutari Ionathas Regem Dauida furores,
Sic contra instantes Princeps generose tyrannos
Nos tibi commissos serua, rege pacis amantes.*

Qu'on peut traduire en François ainsi:

*Comme Jonathan à son frere
Auoit promis de le garder
Contre les fureurs de son Pere;
Ainsi Prince vien nous aider
Contre la fureur & oppresse
Du tyran qui desia nous presse:
Prince heureux, si viure tu fais
Soubs toy ce peuple aymant la paix!*

Il passa outre le bout de la rue duquel on veoit le Pan des tapisseries, estant ce quanton de rue plein de flambeaux allumez, & tonneaux remplis de poix bruslants, & vint iusques à la Meerbrugghe. A l'entrée y auoit vn Elephant portant vn chasteau de pierre avec son artillerie & soldats. Deuât ledit Elephant estoient peintes les armoiries du Marcquisat & de la Ville; & au deuant vne lance avec sa banderolle de taffetas aux armes d'Anjou ceintes de laurier, & quatre autres banderolles de taffetas cramoisi poussées hors; esquelles estoient peintes les mains d'Anuers avec la deuise FOY ET DISCVTIT: & à l'endroit du vêtre estoient ces vers:

*Lunam solebam, nunc iubar constantius
Me fratris exortum rapit,
Videorq, opimam iam videre adoream
Huic huic parente Belgio.*

Qui signifient en François:

*La Lune adorer ie souloy;
Mais ie suis ravi quand ie voy
Se leuer l'astre de son frere;*

VIII.

*Et pense auoir riche moisson,
Puisque ie voy le Brabançon
Esclairé de ceste lumiere.*

IX. De la Meer-brugghe il passa par la Meer iusques au Corps de garde, où estoient quatre compaignies rangees en forme de bataillon. Delà passa iusques au coing de Claire-strate, où estoit vn Theatre fait par la Chambre des Rhetoriciens, nōmée Branche-d'oliuier, qui ont pour leur deuise, *Ecce gratia*: où estoit assise vne pucelle nommée Antuerpia: elle portoit au sein vne petite fille nommée, Cognoissance de Dieu; qui tenoit vn coffre dedans lequel estoient les priuileges, loix, franchises, & la Verité, qui auoyent esté gardez par la grace de Dieu, & par Prouidēce, Sagesse, Foy, Diligence, Loyauté, Perseuerance, Vnion, Bonne garde, Ordre: & au haut estoit vn compartiment à la Phrygienne dedans lequel estoient escrits ces vers:


*Gratia nata Deo, cultu vestita niuali,
Et foliis ornata manum pallentis oliuæ,
O Princeps Patriæ, pater & spes maxima nostræ,
Virginis Antuerpia iussit te celsa subire
Mœnia, & adstrictum populum pietate leuare,
Iustitiâ & nostris depellere finibus hostes.*

Qu'on peut ainsi rendre en François:

*Grace fille de Dieu, de ceste robe blanche
Comme chaste vestue ornée de la branche
D'Oliuier blemissant, Prince l'espoir entier
Et Pere du païs, t'a commandé d'entrer
Dans les superbes murs, & tressaillants de ioye
De la vierge d'Anuers: Que ta clemence on voye
Donner vn prompt secours à ce peuple oppressé,
L'ennemy par iustice hors du Pays chassé.*

Plus bas vers le milieu estoit vn Neptune avec son trident porté par vn Daulphin à trauers les vndes: & à senestre estoient ces vers:

*Grace diuine, & vraye Cognoissance
Ont maintenu la renaissante Anuers,
Par bonne Garde & fidelle Alliance,
Pour toy, grand Duc, fils & frere de France.
Chasse & mets donc par Justice à l'enuers
Ses ennemis cruels, faux & peruers.*









Il passa par Clairestraete tirant à la Langhenieustraete, iusques au Pont Sainte Catherine vis à vis de la ruë nommée Cruystraete, où estoit vn arc triumphal peint en fabricque, bastie de pierre blanche. il estoit enrichi de ses fronts & compartimens avec les armoiries de Son Alt. torches & flambeaux avec Musique de hauts-boix & clairons, & estoit au plus haut escrit:

*Aduentui felicissimo Francisci
Regis Henrici III. Fra. Vnici,
Henrici II. F. Francisci, I. N.
Ducis Brabantia inaugurati,
Principis optimè de patria meriti,
Patris Patriæ.*

S. P. Q. A.

Qui signifie:

*Au tres-heureux aduenement de François
Frere unique du Roy Henri troisieme, fils de
Henri second, & petit fils de François premier,
Duc de Brabant inauguré, Prince qui a
tresgrandement merité, Pere de la patrie.*

S. P. Q. A.

Et au dessus en vn compartiment à la Phrygienne estoit escrit:

Hunc tandem euerso iuuenem succurrere seculo

Ne prohibete.

Qui signifie:

*A la fin n'empeschez ce Prince redressant
Ce siecle renuersé.*

En passant par la Corte-nieustraete, & par le Marché-au-laiët tournant vers la Coupestraet en la ruë nommée de Keyser-ruye iusques au grand-Marché. Le marché estoit remply de flambeaux de cire, de poix en tonneaux esleuez, iusques au plus hautes fenestres, qui sont communement de cinq estages: & estoient en bataille audit marché dix enseignes, avec celle de la Jeunesse à l'Estandart verd: le tout des mieux armées qu'on peut veoir en lieu du monde. Au milieu des Bourgeois estoit le grand Geant fondateur de la ville d'Anuers: sa cuirasse estoit de couleur d'azur, ses habits d'orangé blanc & gris: il portoit Bannieres d'azur, aux armes d'Anjou, & auoit ces vers escrits deuant luy: XI.

Nil

*Nil rabies vesana, furor. vel sua tyrannis
 Profuit imperio, vis aut violentia, nostro:
 Est Regi pietas virtus tutissima; saepe
 Quod violenta nequit peragit tranquilla potestas:
 Nil feritate feres, populum pietate guberna:
 Exemplo truculenta meo sed despice facta.*

Qu'on peut ainsi traduire:

*La rage, la fureur, & fiere tyrannie,
 La force & violence ont de rien proffité
 A mon regne cruel: la seule Pieté
 Est la vertu qui rend la royauté munie.
 La puissance tranquille achève & te parfaict
 Ce que la cruauté iamaïs aux Rois n'a faict.
 La fierté ne faict rien; regne en douce clemence:
 Par mon exemple appren que c'est de violence.*


Derriere le Geant estoient ces vers escrits:

*Cernitis immanem hunc horrenda mole Gigantem;
 Talem olim, ut fama est, tulit Antuerpia tyrannum.
 Voyez l'horrible corps du monstrueux Geant;
 Jadis fut ce tyran dessus Anuers seant.*

XII. Ce Geant tournoit la teste par artifice vers Son Alt. passant, & tenant en main les armes d'Espagne, les laissa tumber, & leua celles d'Anjou. Il y auoit aussi vn Theatre au mesme Marché deuât la Maison de la ville plein de Nymphes & de Vertus: mais d'autant qu'il seruit principalement pour le iour du serment que Son Alteze fist à la ville d'Anuers, qui fut faict le 22. dudit mois, il en fera parlé par cy apres plus amplement.

XIII. Son Alteze sortant du marché prist son chemin vers la ruë appelée Hoogstraet, & approchant de la ruë nommée d'Oudecorrenmerckt, y auoit vne Baleine portant Neptune nud tenant en main son trident; signifiant les grandes commoditez que reçoit la villed'Anuers par la nauigation de la Mer & de la Schelde. Deuant ce monstre estoit vn autre homme nud; & aupres deux figures, à sçauoir Nauigation & Marchandise avec vn Liure de comptes, & vne Bourse telle que les Cassiers portent allants pour receuoir argent. Deuant le Neptune en vn compartiment estoient escrits ces vers:

Terrarum









*Terrarum imperium tibi spondent fata, tridentem
Hunc tibi Neptunus cedo: terrâque marique
Ut domitis monstres votivum Antuerpia fructum
Sentiat aduentus, Duce te, secura pericli.*

Qui ont esté traduits ainsi:

*Le Destin te promet l'Empire de ce monde;
Le Neptune marin te quitte ce trident;
Affin qu'ayant dompté par la terre & par l'onde
Tous monstres furieux ce doux fruit qu'elle attend,
La Vierge Anvers reçoive en ta ioyeuse entrée,
Estant de tous perils sous ta main delivré.*

Son Alt. continua son chemin par la Hooch-straete iusques au lieu auquel estoit la Porte de S. Iean, qui fut abbatuë l'an passé: au lieu de laquelle y auoit vn Arc triumphal à l'Ionienne. Cest arc estoit du tout accōmodé à la deuise de Son Alt. FOVET, ET DISCVTIT. En haut estoit tendu vn voile en forme ouale: en iceluy estoit peint le Soleil; sous le Soleil estoient peintes la Mer avec nauires, & la Terre ornée de sa verdure: apparoiſſoit aussi vne nuée des deux costez, que la lumiere du Soleil esparloit & donnoit sa vigueur à la terre: en la superficie concaue de l'arc estoient peintes trois Deesses, Flora tenant en main ses fleurs, Ceres ayant le froment, & Pomona tenant la corne d'abondance: la terre aussi reuestuë de verdure avec ses arbres, fruits & champs en toute fertilité. ce qui se faiet par la chaleur & vertu du Soleil; & qui est signifié par ce mot FOVET. De l'autre costé à la main gauche les champs tristes & steriles, l'air brun & tenebreux par tout, les arbres & plantes secs: ce qui se faiet par trois Furies, Discorde, Violence & Tyrannie; lesquelles fuioyent à la venue de Son Alteze, suiuant la signification du mot DISCVTIT. De l'autre costé estoit représentée la mesme deuise, FOVET ET DISCVTIT par autre moyen. A la main droite sur FOVET estoit vn grand champ, labouré avec sa maison rustique: le Laboureur estoit vestu à la Françoisse, lequel sēmoit, & vn autre fumât la terre: à la fenestre estoit peint DISCVTIT, auquel costé estoit peint vn Capitaine François armé, qui estoit suiui de ses alliez, confederes, & soldats: pour signifier, que par les traictés & accords faits avec Son Alteze; toute tyrannie, violence, & discorde seront chassées, & par le rayon de ce Soleil le Pais receura toute paix, prosperité, & abondance.

Sur le front estoient ces vers:

*Exoriens veluti obscuras sol discutit umbras,
Aruaque natiuo leta calore fouet;
Non secus aduentu dispergis nubila Princeps,
Ac libertatis spe recreas populum.*

Qui signifie:

*Comme vn soleil leuant espard le noir umbrage,
Et par vn feu naif les terres entretient;
Ainsi ce Prince entrant chasse l'obscur nuage,
Et ce peuple en espoir de liberté maintient.*


Cest Arc triumphal estoit embelli sur le haut de banderolles aux armes d'Aniou, enuironnées de la branche d'Oliuier, le tout sur azur: & d'autres banderolles à champ de gueulles bordées d'argent, & grand nombre de flambeaux ardents; & estoit ledit arc fourni de diuers instrumens de Musique: & estoient les ioueurs d'instrumens vestus des couleurs de la ville.


- X V. Son Alteze passa dessous cest Arc triumphal, & vint en la place nommée den Ouure, en laquelle estoient dix compagnies en bataille, armees comme toutes les autres. Et passant Son Alteze deuant le corps de garde vint iusques à l'endroit de la Monnoye, deuant laquelle estoit vn grand & monstueux Cheual Marin, de hauteur de vingt pieds. Sur lequel estoit assise vne Nymphé, nommée CONCORDE, portant vn escu, dedans lequel estoient peints vn liure & vne verge, nommée LA REGLE DE VERITÉ: portoit vne banderolle en sa main, en laquelle estoit FIDELLE ALLIANCE. Ce Monstre Marin estoit nommé TYRANNIE, & auoit le frein en bouche, avec doubles refnes de chaine de fer, nommée DROIT, ET RAISON: donnant à entendre que S.A. comme vn vray Perseus, deliurera ce Pais de toute tyrannie: & apres
- X VI. gouuenera en toute iustice & raison. A l'endroit de la portede la Monnoye, & où la ruë estroissist, estoient deux obelisques, ou esguilles, & entre icelles vn arc triumphal avec ses colonnes à la Corinthiacque, doré & enrichi de son relief dessus iceluy: sur le front estoient les armes de Son Alt. & autres aux costez, avec bannieres, avec torches & flambeaux. Sous les armoiries de son Alteze estoient les vers suiuaus:


*Illa potens nimiumque viget respublica felix
Cœlitus omnigenis accumulata bonis,
In qua Dux populi caput est: populûsque relata
Obsequitur capiti ceu sua membra vice.*

Cest









*Cest estat est puissant & fleurit bienheureux,
Lequel rempli de biens du ciel en abondance
A pour son chef son Prince: & ce peuple est heureux
Qui rend comme vray membre au chef obeissance.*

Depuis cest arc triumphal iusques au Palais, c'est à sçauoir le long de la ruë S. Michel, qui a de longueur mille pas, estoient assises de chascun costé septante colonnes, restant le passage entre deux de vingt deux pieds; chacune colonne estât de hauteur de douze pieds, avec le lambris continuel appuyé sur les pilliers, sur chacune deuxiesme desdictes colonnes vn flambeau, & entre deux les armes de Brabant, d'Anjou, & d'Anuers, distinctes selon les espaces entre lesdictes colonnes. Icelles colonnes estoient couronnées de lierre. XVII.

A costé de la porte du Palais estoit vn spectacle avec ses banieres, flambeaux, & pyramides: Sur le haut de l'vn des costez estoit vne grue; & sur l'autre vn coq: donnans à entendre tant aux chefs qu'aux membres, que la Vigilance est necessaire. Vn petit chien signifiant fidelité, & vn aigneau signifiant paix, y estoient peints accompagnez de Sibylles, qui representoyent prudence, amour, foy, obeissance, vertu, honneur; sans lesquelles nulle vraye paix peut consister, & le tout estant conduit par la lumiere du S. Esprit, qui estoit représentée par vne clarté qui descouuroit les principaux instrumens de Discorde; à sçauoir Enuie, & Calomnie se mōstrants par derriere: Enuie mangeant son cœur, & Calomnie avec double cœur, langue, & visage, mais avec peu d'effect: car des deux costez dudit spectacle estoient deux figures, d'vne part Hercules, & de l'autre estoit peint comme en bronze Dauid victorieux de Goliath: signifiens force & magnanimité: & dessous estoit CONCORDE; laquelle tiēt Discorde enchainée, ayāt le col enuironné de couleures, qui presente d'vne part la pome d'or: de l'autre menace de ses forces & tyrannies; & neantmoins est chassée en la spelunke de Tristesse, où elle est detenuë par Concorde; qui tient la porte close: signifiant ce que le Pais attend de Son Alteze suiuant sa deuise, FOY ET DISCVTIT. XVIII

Sur le front au cōpartiment fait à la Phrygienne, estoient ces vers:

*O sit Iustitia Pacique ut basia tellus
Sentiat, & facili fundat opes gremio.
Atque comes Pietas Fidei facta obuia, nexus
Omnia solemnibus firmet amicitia.*

Qui se peuuent ainsi traduire:

*Que la terre sentir de Paix & de Iustice
Puisse les doux baisers : qu'elle espanse ses biens
Sans peine & sans labeur, que d'éternels liens
La paix ioincte à la foy le tout affermir puisse.*

Deuant qued'arriuer à Sainct Michel, où estoit préparé le Palais pour Son Alteze, le iour estoit passé: tellement que toute la ville estoit esclairée comme en plein iour d'une infinité de flambeaux & torches; & la clarté estoit telle, & avec tant de lustre, que tant la personne de Son Alteze, & des Princes & Seigneurs qui l'accompaignoyent, & pareillement des soldats avec leurs armes luisantes paroissoient plus, que durant le reste du iour: & comme le peuple auoit esté en grâde multitude en toute la ville; aussi d'autant plus que Son Alteze approchoit de son Palais, il estoit encores de beaucoup plus grand: & ainsi entra Mondit Seigneur le Duc de Brabant, & d'Anjou en son Palais en l'ordre qui a esté dit: ayant outre cela apres luy de deux à trois cens tant criminels, que bannis le suiuañts à testes nuës & liez, qui demandoient misericorde. Les Herauts iettoyēt desdictes pieces d'or, & d'argent, comme ils auoyent fait par tous les quarefourcs de la ville en passant.

XIX. A l'entrée dudit Palais estoit vn arc de vingt deux pieds, à trois colonnes à la Phrygienne: au haut estoit vn compartiment auquel estoient trois Graces, à sçauoir, Vertu, Gloire, & Hōneur, luy presentans l'Oliuier signe de paix, le Laurier de victoire, & la Couronne qui luy estoit enuoyée du ciel: & estoient sous ledit compartiment escrits ces vers:

*Qui decus anteuenis meritis, virtutibus omnes,
Fortunâque animis vincis, virtutibus annos,
Accipe Nympharum facilis tria munera, Oliue
Ramum, victricem Laurum, meritâque Coronam.*

Cest à dire:

*Par tes hautfaicts l'honneur & tous en meurs tu passe,
Par courage fortune, & par vertu tes ans,
L'Oliuier, le Laurier, la Couronne, presens
Des trois Nymphes reçois d'une ioyeuse face.*



LE SERMENT, FAIT³⁷

PAR MONSEIGNEVR FRANÇOIS

DVC DE BRABANT, AVX MEMBRES DE

la tres-renommée Ville d'Anuers : & le Serment faict par lesdicts Membres à Son Alteze.



MONSEIGNEVR le Duc de Brabant estant entré en son Palais, se fist vne scoppetterie de vingt ou trentemil coups d'arquebouzes; & dès lors commanderent toutes les compagnies (exceptées celles qui auoyent la garde ceste nuit) à se retirer au pas. ce qu'ils firent avec tel ordre & silence, qu'en moins de demie heure toute la ville fut desarmée; comme elle auoit esté le matin mise en armes sans bruit en moins d'une heure. Les Princes & Seigneurs aussi se retirerent chascun en leurs logis, & dès lors commença à iouer toute l'artillerie de la ville par deux fois, comme elle auoit faict à l'entrée: tellement qu'il sembloit que toute la ville fust en feu: les flambeaux & feux de ioye furēt allumez par toutes les rues & quarrefours, sur les clochers en si grand nombre, & si continuels que toute la nuit sembla vn iour: & mesmes ceux qui estoient hors la ville regardans le ciel, leur sembloit estre entierement enflambé. Ces feux de ioye continuerent toutes les nuits iusques au Ieudi ensuiuant: auquel iour son Alteze fist le Serment particulier à la Ville, auquel furent gardees les solemnitez qui ensuiuent.


Les Sieurs Amptman, Bourguemaistres & Escheuins de la ville d'Anuers, le Ieudi vintdeuxiesme dudit mois se transporterent au Palais de S. Michel; auquel lieu supplierent tres-humblement Son Alteze; Comme il luy auoit pleu donner le sermēt aux Estats de Brabant & Marquisat du Saint Empire, & le receuoir; aussi qu'il luy pleust donner ceste iournée le serment particulier à la ville d'Anuers, & le receuoir au lieu accoustumé de toute ancienneté. A quoy s'estant accordé Son Alteze se mirent en chemin selon l'ordre de l'entrée, estant pour ce iour le Seigneur Edouard de Clastro Ambassadeur du Roy Don Antonio de Portugal au dernier rang des Princes & Seigneurs: & ainsi marcherent le long de ladicte rue de S. Michel vers le grand-Marché: au-

quel est la sumptueuse maison cōmune de la ville. Et d'autāt que le iour de l'entrée, à raison de la nuit qui suruint, ne fut possible de bien recognoistre les monstres; ils furent derechef representez à Son Alteze, tant en la place deuant la Monnoye qu'ailleurs. Et d'aduentage furent preparez deux spectacles qui auoyēt esté dressez en vn iour: l'vn estoit le Mont Parnasse, sur lequel
 XX. estoit seant Apollon, accoustré en façon de Soleil: les neuf Muses l'accompagnoient, qui iouoyent de diuers instrumens de musique accordez, & chantoient ensemble harmonieusement de la voix vne Ode escrite à la louāge de Son Alteze. Sur Apollō estoient les armes de Son Alt. Ce spectacle estoit en la rue nommée Hooch-strate, regardant la rue nommée Reyner-strate. Vis à vis dudit spectacle y en auoit vn autre du costé de la rue nommée de Vlas-merct: Lequel estoit vn Roc moussu, couuert d'arbres secs & arides, & y apparoissoit vne spelunque sombre, & obscure, & triste à regarder: en laquelle estoient cōme cachees les Furies infernales; à sçauoir Discorde, Violence, & Tyrannie: lesquelles sentans les rayons d'Apollō, & oyans la douceur & harmonie des voix & des instrumens, se retiroient & cachoyent au plus creux de la spelunque; & puis derechef se monstroyent pour entendre si cest accord, & harmonie duroit encores, en intention, s'il cessoit, de remuer encor, & troubler la Republique.

Son Alteze passa outre, & vint iusques au grand-Marché à tresgrande difficulté, à raison de l'infinité multitude de peuple, qu'on auoit trop de peine à faire serrer: & estant descendu de cheual,
 XXI. monta sur le Theatre, qui auoit esté dressé à cest effect, au milieu dudit marché pres la Maison publique de la ville, marchants deuant luy, le Magistrat de ladicte ville, plusieurs Princes, Seigneurs & Gentils-hōmes. Ce Theatre estoit grand & spacieux de la haulteur de 40. pieds. Ledit Theatre estoit tapissé d'escarlatta, & y estoit rendu vn dais avec le dossier de drap d'or frisé, & dessus vne chaire de mesme. Du costé droict au iour de l'entrée y auoit esté representée Prudence presentāt vn sceptre doré, à la fenestre estoit Iustice presentāt par dessus la chaire le glaive de Iustice, & derriere estoit Clemēce, presentant le chapeau Ducal. Deuant la chaire estoient comme aux pieds Obeissance, Foy, Amour de Dieu & Reuerence, & avec icelles aux costés de la chaire estoient Concorde, Sageſse, Vaillantise, Beneuolence, Verité, Pieté, Perseuerance, Raison: desquelles deux aux deux costez tenoyent chacune vn flambeau de cire vierge, & toutes habillées

en





en Nymphes. Le iour que Son Alt. y monta, estoit vuide ledit Theatre desdites Nymphes: il estoit des deux costez garni de colonnes: à la main droite, entre les colonnes estoit vn Lyon tenant vn glaive nud; signifiant l'autorité du Magistrat. Dessus le Lyon estoit vn Aigle nourrissant ses petits, & se tournant vers la lueur du Soleil, comme prenant sa force du Prince: à la fenestre estoit vn bœuf, ayant le ioug au col, & dessus vne geline couuant ses poussins; & aupres vn coq. Le bœuf avec son ioug, signifioit obeissance: le coq & la geline signifioient vigilâce, soing, & defence du superieur. Ledit Theatre estoit orné de banderolles d'azur aux armes d'Anjou, & de gueulles aux armes d'Anuers, de flambeaux & torches: & au dessus entre les armoiriers estoient ces vers:

*Venisti tandem, atque tua expectata tueri
Ora datur.*

*En fin tu es venu, & nous fais voir ta face,
Si long temps attendue.*

Et peu au dessous à la droite sous les armoiries de Brabant:

*Frustra magnanimos iactarunt regna triumphos,
Iustitia equali populos ni lance gubernent.*

*Que le vaincre tant ne s'advance Sous soy pour l'egalle balance,
Se vantant ce propos tenir: Tous Royaumes Justice tient,
Qu'il peut les regnes maintenir. Et en seur repos les maintient.*

Et à la fenestre sous les armoiries d'Anuers:

*Ni Leges, ni sceptrum valent, ni cura Senatus,
Plebs nisi legitimis submittat fascibus arma.*

*Soing du Senat ni les Loix, Si le bon peuple ne rend
Ni le Sceptre des grands Roys Au iuste gouvernement
N'ont aucune puissance, Entiere obeissance.*

Et encor plus bas estoit escrit:

*Est Deus, est qui cuncta mouet præcordia Regum
Cui quàm celsa cadunt, hinc vultu utcumque sereno
Despectat populos, placidam sub rege quietem
Dat iusto: ast alios exercet dura tyrannis.*

*Dieu est seul, & seul ment le courage des Princes,
Tout baïsse deuant luy, & toutes les Prouinces*

*Il contemple d'en haut, aux bons peuples donnant
Justes Roys: des tyrans aux meschans ordonnant.*

De ce Theatre pouuoit veoir Son Alteze deuant luy vn peuple infini appresté pour luy faire le sermēt, & en trois bandes les bannis & criminels, liez à teste descouuerte demadans misericorde: qui leur fust faicte; & pareillement toutes les maisons du marché ayants deuant elles iusques au haut flambeaux allumez. La place estant donc prinse, & le silence faict, le Conseiller & Pensionnaire Vanderwerck proposa comme il ensuit:

Serenissime Seigneur & Prince,

LE Marcgraue, Amman, Bourgemaitres, Escheuins, Thre-
foriers, & Receueurs, Vieux Escheuins, Chefs de la Bourgeoisie,
& Maistres des quartiers, Doyens, & Anciens des Mestiers, en-
semble les Colonels, Doyens des Guldes, & Capitaines de ceste
ville, treshumbles & trefobeissants subiects de Vostre Alteze, re-
çoient vn extreme contentement de veoir V. Alt. desia receuë
pour Duc de Brabant, & pour leur Seigneur & Prince, & preste
pour faire le serment à ceste ville; & le recevoir du Magistrat,
Bourgeoisie, & Habitans d'icelle, au regard de la Ville, & Marc-
quisat du Sainct Empire. Et s'assurans que V. Alt. leur sera bon,
droicturier, & legitime Prince, les gouernant selon leurs priui-
leges, loix, & coustumes: promectent aussi reciproquement à V.
Alt. de luy estre bons, loyaux, & fideles subiects; & d'employer
tous leurs moyens, & mesmes leur propre vie pour son seruice, &
pour la conseruation de sa dignité, droicts & preeminences. Et
comme le bon Dieu a inspiré à V. Alt. de prendre premierement
la protection, & defense; & depuis l'entiere seigneurie du Pais-
bas, & Prouinces qui ont contracté avec V. Alt. esperent que le
mesme Dieu par sa clemence, & misericorde benira, & fera pros-
perer tellement les desseings, & entreprinſes de V. Alt. Que bien-
tost verront icelle colloquée au plus haut degré de ses mag-
nanimés, & heroïques desirs; & le Pais en general, & en particu-
lier deliuré des calamitez & miseres de la guerre, auoir tant meil-
leur moyen de recognoistre les grandes graces, & benefices re-
ceues de V. Alt. & le honorer, aimer & seruir, comme vray Pro-
tecteur du Pais, & Pere de la Patrie.

Ce qu'estant faict, Son Alteze, ayant aussi respōdu, en confor-
mité

mité de ce qu'il auoit dict dehors la ville, ledit Vanderwerck a déclaré à haute voix au peuple, Que Son Alteze estoit prest de leur faire le serment, & le receuoir du Magistrat, & tout le peuple, & habitans de la ville d'Anuers. Qu'il auoit pleu à Dieu leur enuoyer vn Prince de si rares & heroïques vertus, & de si grande puissance, & frere vnicque d'un si grand Roy; & qu'on esperoit, que bien tost, le mesme Dieu luy donneroit le moyen de subleuer ces Pais de tant de calamitez, & miseres dont il estoit oppresé. Et comme son Alteze auoit esté receuë par solemnelle delibération des Estats cōfederez, & mesmes par solemnelle resolution de tous les membres de ceste ville, & que Dieu commandoit d'aimer, reuerer & obeir aux Princes; Qu'on exhortoit le peuple de selon le commandement de Dieu, luy porter toute humble obeissance. Qu'à cest effect leur seroit leu le serment lequel Son Alteze presteroit, & mesmes celuy qui seroit presté par le peuple, Priant Dieu de donner la grace à Son Alteze de, suiuant iceluy, bien gouuerner & regir; & aux Bourgeois & habitans de ceste ville d'Anuers de s'en acquiter (touchant l'obeissance) comme bons, loyaux, & fideles subiects sont tenus de faire: Et que le nom de Dieu en soit sanctifié au bien, prosperité, & assurance de ceste ville, grandeur, & accroissement de puissance, honneur, & gloire de Son Alteze.

Fut depuis leu par ledit Vanderwerck le mesme Serment à faire par Sadite Alteze avec le tiltre de Duc de Brabant, & tous autres. Lequel Serment fut leu en François à Sadite Alteze, & receu par le Seigneur Philippe de Schoonhouen, Seigneur de Wanroy, Bourguemaistre de dehors.

Ce qu'estant fait fut leu par ledit Vanderwerck le Serment lequel le Magistrat, & le peuple auoit à faire: lequel fut suiuy de mot à mot, ainsi cōme il le prononçoit, par ceux du Magistrat, & grand nombre du peuple qui le pouuoit entendre. Lequel serment fut stipulé du Magistrat, & peuple d'Anuers par l'Amman, au nom, & par commandement de Sadite Alteze.

Lesquelles solemnitez estant acheuées, Son Alteze par deux ou trois fois ietta, à pleine main, des pieces d'or & d'argent: & en apres les Herauts, les trompettes & tambours sonnans de toutes parts, & plusieurs instruments de musique, comme ils auoyent aussi fait deuant l'arriuée de Son Alteze: & puis estant descendu

du Theatre entra en la Maison de ville avec tous les Princes, Seigneurs, & Gentilshommes en grand nombre; où il fut receu par les Sieurs de la ville, & disna publicquement au festin qui luy auoit esté appresté tressumptueux & tresp magnificque: & se passa toute la iournée en grand ioye, contentement & admiration, tant de Son Alteze & de sa suite, qu'vniuersellement de tout le peuple. Le soir ioua derechef deux fois toute l'artillerie: les feux de ioye furent continuez beaucoup plus grands, & en plus grand nombre qu'auparauant. Et ainsi s'acheua la ioyeuse, & magnificque entrée du Prince magnanime Monseigneur François fils & frere vnicque de France, par la grace de Dieu Duc de Brabant. Le reste de la sepmaine, & iours suiuaus les Sieurs du Conseil-priué, des Aides, des Finances, Châmbres des comptes, & autres Corps, Colleges, & Communautéz vindrēt cōgratuler à Son Alteze, luy offrir leur treshumble seruice, & promettre toute fidelité & obeissance: lesquels tous il receut fort benignemēt, & leur dōna à tous cōtentement, leur respondant si à propos, de si bonne grace, & avec telle dexterité, n'obmettant vn seul poinct, de ce qui luy estoit proposé; que non seulement vn chacun l'admiroit, mais estoit contrainct de l'honorer & l'aimer, & prescher ses louanges entre le peuple. Finalemēt les Deputez des Eglises reformées des deux langues presentez par Monsieur le Prince d'Orange furent ouïs; qui proposerent à Son Alteze comme il ensuit:

MONSEIGNEUR, nous sommes enuoyez vers vostre Alteze, de la part des Eglises reformées de ceste ville, de la langue de bas Allemand, & de la langue Françoisē, pour luy declarer en toute humilité, reuerence & subiection, que nous auons loué & louons Dieu de tref-bon cœur, qu'il luy a pleu conduire Vostre Alt. si heureusement en ce lieu: ensemble que nous conioignons nostre ioye avec celle de tout ce peuple, que nous esperons Vostre Alt. auoir recogneuë en la reception & ioyeuse entrée, qui luy a esté faicte en ceste villed'Anuers. Nous esperons aussi Monseigneur, comme ces Pais sont paruenus à leur grandeur & felicité si grande, que peu d'autres Pais l'ont egallé soubz la Seigneurie & gouvernement des Tres-illustres Princes, Messeigneurs les Ducs de Bourgoigne, issus de la tres-noble Maison de France; aussi que soubz la conduite & gouvernement de Vostre Alt. estant de la mesme Maison, sera recourée par sa valeur, & conseruée par sa sagesse,

sagesse, la même dignité & splendeur ancienne. Il y a peu moins de trois cens ans, Monseigneur, que ces Pais estoient gouvernez par diuers Ducs, Contes & Seigneurs, auquel temps ils n'auoyēt pas acquis ceste grandeur, que les autres nations ont depuis tant admirée: le premier qui commença à les accroistre, fut Monseigneur Philippe Duc de Bourgoigne surnommé Le Hardi, qui estoit frere du Roy Charles cinquiesme, fils du Roy Ian, & petit fils du Roy Philippe de Valois; desquels Rois, Monseigneur, V. Alt. est descenduë en droite ligne masculine; Car Monseigneur le premier Duc d'Orleans, fut fils du Roy Charles cinquiesme, duquel vostre Alt. aussi est issue en droite ligne masculine, & n'y a plus que le Roy & Vostre Alteze des enfans masles, de Mondit Seigneur d'Orleans: tellement que Messeigneurs de Bourgoigne sont grands Oncles paternels de vostre Alteze: & pourtant nous ne doubtons qu'elle ne vueille imiter leurs vertus, en restituant cest estat en son ancienne splendeur & dignité, aussi de le conseruer & augmenter, comme il a esté esleué en ceste grandeur par Messeigneurs vos oncles. Monseigneur Iean fut le second Duc sous lequel cest estat fut beaucoup agrandi: mais il n'eut point sa perfection iusques au tēps de son fils Monseig. Philippe secōd: & fut conserué cest estat en son entier, par Monseigneur Charles dernier Duc de Bourgoigne, tant qu'il vescu. Or Monseigneur Philippe le second, auquel proprement appartient l'honneur de l'establissement de cest estat, a esté, Monseigneur, vn des plus cheualeureus, & vaillās Princes de son temps: il donna neuf batailles, qu'il gagna toutes: esquelles souuent est venu à l'espreuue de sa personne, & a combatu de sa main. C'estoit vn tressage Prince, & qui a eu à desmesler des affaires avec les plus grands Princes de la Chrestienté, dont aucuns luy estoient aduersaires; & neantmoins s'est si sagement porté, qu'il est venu à son honneur de tout ce qu'il a entrepris. Il a esté tresriche: car non obstant tant de guerres qu'il a eues, qui ont duré plus de trente ans, il a laissé en meubles & argent comptant plus que nul aultre Prince de son siecle, comme nous en rendent tesmoignage les Historiographes de son temps. Et toutesfois, Monseigneur, non obstant ces grandes vertus & qualitez, il ne fut point surnommé Philippe le vaillant, ni Philippe le sage, ni le riche; mais il a esté appelé de tous, Philippe le bon: estant par vn consentement general de tout le peuple donné à cognoistre,

quelle est la vertu la plus seante & propre à vn grand Prince, & plus agreable à vn peuple, c'est la bonté du Prince, & amour envers ses subiects. Tous esperent, Monseigneur, que Vostre Alteze voudra ensuiure l'exemple de ce bon Prince, qui a premierement dressé cest Estat en sa perfection, & qui a esté Prince de la tref-noble, & tref-illustre Maison de France.

Nous louons Dieu, Monseigneur, que tous ceux qui ont eu cest honneur d'approcher de V. Alteze, rendent tesmoignage qu'elle a de trefgrands commencements de ces vertus: nous prions Dieu qu'il luy plaise les parfaire & accomplir; tellement qu'avec trefgrand honneur de V. Alteze tout ce peuple en puisse recevoir les fruiçts paruenus & accreus à leur perfection & maturité. Ce desir, Monseigneur, nous est commun avec tout le reste du peuple. Mais nous auons vne treshumble requeste à faire à V. Alteze, qui nous appartient plus particulièrement, & que nous supplions treshumblement V. Alteze nous vouloir accorder. Nous sommes induits, Monseigneur, à ce faire par le nom que porte Vostre Alteze, qui est François: car toutes les fois que nous l'oyons nommer, la memoire de ce grand Roy François ayeul de Vostre Alt. nous reuiet en l'entendement. C'estoit vn Prince tref-vaillant, trefmagnanime, trefmagnifique, & trefbeau; & nonobstant toutes les nations de la terre par vn commun consentement l'ont surnommé le Pere des lettres. Car à la verité, depuis l'Empereur & Roy Charles le grand il n'y a eu en France Roy tant amateur des lettres que ce grand Roy François. & comme le Roy Charles fut le fondateur de la trefameuse Vniuersité de Paris, aussi le Roy François en a esté restaurateur, ayant l'un & l'autre appelé des Pais estranges, & à grands frais, des hommes excellens en sçauoir pour enseigner les langues, & toutes sortes de sciences. La maison de ce grand Roy François estoit vne Academie, sa table vne conference de toutes disciplines: Et comme plusieurs grands Princes de son temps ont suiuy son exemple, & ont enrichi leurs Empires, & Royaumes de gens lettrez & des lettres: aussi nous supplions treshumblement V. Alteze, ensuiuant l'exemple de ce grād Roy son ayeul, de faire le semblable, auoir les lettres en singuliere recommandation, & prendre sous sa protection ceux qui en font profession. Il est vray, Monseigneur, que par la malice des hommes la guerre ordinairement est la ruine des lettres: Mais si vn grand Prince s'y oppose, il peut aisement empescher ce mal.

mal. Nous ne demandons point, Monseigneur, que Vostre Alteze oublie l'estude & exercice des armes pour les lettres: mais qu'il luy plaise de suiure, tellement l'un, que l'autre ne soit point de-laiſſé & oublié. Car comme nous voyons plusieurs Republicques, tandis qu'elles ont eſgallement fait profeſſion des armes & des lettres, auoir auſſi eſté tresfloriſſâtes: mais lors qu'elles ont eſté en la plus grâde fleur des ſcièces, elles ſont neâtmoins tûbées és mains de leurs ennemis, pour ſ'eſtre deſaccouſtumées de leur ancien meſtier des armes: ainſi qu'il aduint aux Atheniens, qui tumberent par ce moyen en la puissance des Roys de Macedone: Ainſi les peuples qui ont fait profeſſion des armes, ſans y conioindre les lettres, ſont touſiours deuenus barbares, cruels; & ſe ſont trouuez deſpouillés de toute humanité: Comme nous voyons aujourd'huy à l'endroit des Tartares & Moſcouites. Et pourtant il nous ſemble qu'à bon droit on peut appeller les armes, le fondement & les nerfs de la Republicque: mais que les lettres adiouſtent à ce corps les viſues, & naiſſues couleurs, l'embelliffent, & luy ſeruent d'enrichiſſement & ornemens: Et pour-tât comme nous ne voudrions ſupplier V. A. d'oublier ceux qui ſont profeſſion de la milice, leſquels elle doit embrasſer comme ſa force, auſſi nous la ſupplions treshumblement ſe vouloir ſouuenir des lettres, & de maintenir les gens lettrez par ſa grace & ſa faueur. Nous ſommes contraints, Monſeigneur, de faire à V. Alteze ceſte treshumble requeſte; premierement par ce que faiſans profeſſion des lettres nous les debuons auoir en ſinguliere recommandation, pour enuoyer à noſtre poſterité, ſ'il nous eſt poſſible, le meſme fruit, dont nous auons iouy de noſtre temps: & auſſi pour le ſerment que nous auons donné prenans nôs degrés; qui eſt, De maintenir & aduâcer en quelque degré que nous paruiendrons, les Vniuerſitez & les lettres: Et pourtant nous eſperons que Vostre Alteze nous fera ceſt honneur de prendre de bonne part ceſte noſtre treshumble requeſte. Quant à ce qui touche nos perſonnes, nous vous promettons, Monſeigneur, toute obeiſſance, fidelité & ſubiection, & ſelon noſtre petite mediocrité nous nous employerons vers ceux auſquels nous aurons moyen & acces, à ce qu'ils rendent obeiſſance à Vostre Alteze; & aux Magiſtrats qu'il luy plaira d'eſtablir ſur ce peuple.

Et pour la fin, nous priôs Dieu de tresbon cœur, qu'il luy plaiſe, Monſeigneur, conſeruer V. Alteze longuement & heureuſe-

ment au milieu de ce peuple, luy faire la grace de le regir & gouverner en toute iustice & equité, le deliurer de la main de ses ennemis, le maintenir en longue & heureuse paix, & restablir cest estat en son ancienne dignité, grandeur, splendeur & felicité; & apres son deces laisser vne memoire tresheureuse, & trefrenommée entre tous peuples. Et pour ce faire, nous prions derechef le Roy des Roys, & le grand Prince des Princes vous rendre, Monseigneur, vaillant comme Daud, sage comme Salomon, & zelateur de sa gloire comme Ezechias.

Ausquels respondit Son Alteze, Qu'il estoit bien aise de veoir vn tel consentement en tout le peuple à sa reception, Qu'il espoirait aussi tellement les regir & gouverner, qu'ils ne seroyent deceuz de l'esperance qu'ils auoyent conceuë de son gouvernement: Lequel il conformeroit à celui de ses predecesseurs, & grands oncles, qui auoyent tant heureusement conduit ces Pais: Qu'il les remercioit de leur bonne affection & volonté, & qu'il les prenoit en sa protection avec tout le peuple en general: les prioit de continuer, & comme par ci deuant il auoit eu en singuliere recommandation les gens de lettres, aussi qu'il desiroit de continuer à l'aduenir.

Et ainsi a commencé ce grand Prince à gouverner ce peuple avec grande autorité coniointe avec moderation, & le peuple à rendre à Son Alteze vne tref-voluntaire & treshonorable obeissance: & est l'esperoir de tous, en general & en particulier, que Dieu luy fera la grace de poursniure en vn si saint & si louable regime; & que par son exemple, il monstrera aux autres Princes, & à toute la posterité combien peut vn legitime & iuste gouvernement; & le peuple de sa part, quelle est son obeissance, amour & constance enuers ses bons Princes: esquelles vertus iamaïs aultre peuple ne les a sceu surmonter, & encores ne le pourra à l'aduenir, avec l'aide du grand Dieu, & eternal Pere de nostre Sauueur Iesus-Christ, auquel soit gloire en l'vnité du saint Esprit, eternellement, Amen.

F I N.

Sommaire du Priuilege.

FRANÇOIS de France, frere unique du Roy, par la grace de Dieu Duc de Lothiers, de Brabant, de Limbourg, de Gheldres, d'Anjou, d'Alençon, de Touraine, de Berri, d'Eureux, & de Chasteau Thierry, Conte de Flandres, de Hollande, de Zee-lande, de Zutphen, de Maine le Perche, de Mantes, de Meulan, & de Beaufort, Marquis du Sainct Empire, Seigneur de Frise & de Malines: ayant retenu & confirmé Christophle Plantin pour son Imprimeur, luy a donné le pouuoir d'imprimer tous Edicts, Mandemens, Lettres patentes, Statuts, Ordonnances, Placarts, & autres choses concernant le public en general, & pour chacune ville en particulier: & spécialement le Discours de son Entrée & reception en sa ville d'Anuers, & autres Païs de pardeça: Defend à tous autres de quelque estat, condition, ou qualité qu'ils puissent estre, d'imprimer ne faire imprimer, vendre ne distribuer les mesmes, ne semblables liures, sur peine de confiscation d'iceux, d'amende arbitraire, & de payer tous les dommages, & interests dudit Plantin: comme plus amplement est déclaré aux Lettres patentes, Données à Anuers le xvij. iour du Mois d'Auril, M. D. LXXXII.

Souffigné

I. van Asseliers.

RARE 84-B
FOLD 24186

